

EUANGELIA MATAIO DETARER.

¹ Abele Iauali, abele Iesu Keriso ra kusi, abele Dauida ra uerem, abele Aberahama ra uerem.

² Aberahama esomelu Isaaka; Isaaka esomelu Iakobo; Iakobo esomelu Iuda gako abara keimer giz;

³ Iuda esomelu Faresa gako Zara Tamaraelam; Faresa esomelu Eseroma; Eseroma esomelu Arama;

⁴ Arama esomelu Aminadaba; Aminadaba esomelu Naasona; Naasona esomelu Salemona;

⁵ Salemona esomelu Boasa Rakabelam; Boasa esomelu Obeda Rutelam; Obeda esomelu Iese;

⁶ Iese esomelu abele Dauida opole; Dauida opole esomelu Solomona Uria ai koskerlam;

⁷ Solomona esomelu Reoboamo; Reoboamo esomelu Abia; Abia esomelu Asa;

⁸ Asa esomelu Iosefata; Iosefata esomelu Iorama; Iorama esomelu Usia;

⁹ Usia esomelu Iotama; Iotama esomelu Aasa; Aasa esomelu Esekia;

¹⁰ Esekia esomelu Manase; Manase esomelu Amone; Amone esomelu Iosia;

¹¹ Iosia esomelu Iekonia gako abara keimer giz, abele kerker Israaela namarare Babelonia ge areselam.

¹² Abele kerker Israaela bosu Babelonia ge Iekonia esomelu Salatiela; Salatiela esomelu Zerubabela;

¹³ Zerubabela esomelu Abiuda; Abiuda esomelu Eliakima; Eliakima esomelu Azora;

¹⁴ Azora esomelu Sadoga; Sadoga esomelu Akeima; Akeima esomelu Eliuda;

¹⁵ Eluida esomelu Eleazara; Eleazara esomelu Matana; Matana esomelu Iakobo;

¹⁶ Iakobo esomelu Iosefa Maria ra kimiar, Maria esomelu Iesu, abara nei atker Keriso.

¹⁷ Dasmer, nosik uridili a ditimeda Aberahama bakedida Dauida dog foatin gaire nosik; a ditimeda Dauida dog bakedida abele kerker Isaraela namarare Babelonia ge foatin gaire nosik; a ditimeda Babelonia ge bakedida Keriso dog foatin gaire nosik.

¹⁸ Emereta Iesu Keriso esmelu mokakalam: Abara apu Maria au lagelage Josefaim, E deredare abara kem Lamar Zogolam, epe uiaba nole okakis.

¹⁹ Ege Iosefa abara kimiar, abele le barkak tonar, E nole dikiapor Maria detage gaire le opem, E dikiapor gumik atuaki abima.

²⁰ E okabatagere abele gaire lu, dasmer, abele Opole ra Angela etomelu abi abele peim, kega, Iosefa ae, Dauida ra uerem, ma nole geum ma ko egaret Maria mara kosker; abelelam abara kem Lamar Zogolam.

²¹ E esomelu abara kimiar uerem, ma abi nei etkeroa abim IESU; abelelam E uerkab abara ged uiaba uitelam.

²² Uao bakedida gaire lu uridili, iaueakai ageakarem Opole ra mer, abele perofeta, kega,

²³ Dasmer, abele neur ra kem ko esomeloa abele kimiar uerem, uiaba nei etkeroa abi Emanuela, tonar abele, ese etomeret, Ade Meribi okakis.

²⁴ Josefa ekiamulu utelam E ikerare abkoreb mokakalam Opole Angela ra mer, ko egaret abara kosker:

²⁵ Ege uiaba nole obapit kak bakedida abele kerker esomelu abara narbet kimiar uerem, E nei atker abi IESU.

2

¹ Abele kerker ge Iesu esmelu muige Bethelema Iudaia ge, abele kerker ge Heroda opole, dasmer, makoi le tabakeuare naiger pekalam Ierusalemam,

² Kega, Nade abele kimiar uerem esmelu Iudaia le la Opole? abelelam keriba erdali abara uer abele naiger peke, keriba tabakeuare abi esorgiru abim.

³ Heroda opole asor, E okasosok gako Ierusalemam uridili.

⁴ E natameare gaire zogozogo le giz a aotale giz abele ged ge, E uiabi nautmerare nade Keriso esmelu.

⁵ Uiaba abi detagerare, Muige Bethelema Iudaia ge; abelelam perofeta detarare, kega,

⁶ Mama Bethelema muige abele ged Iudaia, ma nole kebile gaire Juda opole; abelelam ma giz abele Tarima le, E sirdam Isaraela kara ged.

⁷ Heroda gumik emariklu taraisare gaire makoi le tabakeuare abim, E nautmerare uiabim, na kerker uiaba erdali abele uer.

⁸ Heroda naunarakare uiaba bakeuare Bethelamam, kega, Bakeuare mamor deraimerare abele sursur uerem; ese uaba erdali, kari natomertare, kai naobukilu esorgiru abim.

⁹ Ui ge aserare abele opole, ege uiaba bakeuare; dasmer, abele uer uiaba erdali naiger apek, kekiam uiaba opem, abele uer emerilu tumem abele kebi uerem ra uteb.

¹⁰ Uiaba erdali abele uer, uiaba au sererege.

¹¹ Uiaba barot abele meta, uiaba erdali abele uerem gako abara apu Maria, a uiaba esorgiru abim; uiaba detuerare a itiru uiaba lu, ege uiaba naisuerare abim nase lu, abele gold, gako sus lipano, gako abele sus muro.

¹² Uiabim natomertare abele peim ge Adela uiaba nole ko bakomet Herodaim, ui ge bakeuare uiaba gedim nerute gab ge.

¹³ Ui bakeuare, dasmer, abele Opole ra angela E natomertare Iosefaim abele peim ge, kega, Tekue, ma ais abele sursur uerem, gako abara apu, ua derareteder Aigupitoem, uaba emeridare kari naokaideroa kara mer marim, abelelam abele Heroda E deraimerare abele sursur uerem ko ipitare eumilu.

¹⁴ E tekuelu a ais abele sursur uerem, gako abara apu abele ki ge, ui bakuidare Aigupitoem;

¹⁵ E dauer niai niai Aigupito ge abele itudilu Heroda ra mop; iaueakai bakedida abele Opole ra mer perofeta detarare, kega, Kaka dabgiri kara uerem Aigupitolam.

¹⁶ Heroda nardarare gaire makoi le abi okaderdare, abelelam E au uekuge E namarkare uader le narsare kimiar uerem giz Bethelama ge bakedida nener ge, ditimedare uiaba neisurut, gako uader kebile maike abkoreb, abele kerker ge Heroda deraimerare gaire makoi le.

17 Ga akailu abele Ieremia perofeta ra mer, kega,

18 Ua aserare abele ebazoer Rama ge, abele au ebazoer op batapelare, Rasera E ezuer abara omasker, umer kak E paimilu, abelelam abara omasker eseamulu.

19 Ege Heroda eumilu, dasmer, abele Opole ra angela etomelu Iosefaim abele peim ge Aigupito ge,

20 Kega, Ma ais abele sursur uerem, gako abara apu, bakeuidare abele gedim Isaraela; abelelam emetu eumilu uader le deraimerare abele sursur uerem ipitare eumilu.

21 E ge tekuelu ais abele sursur uerem, gako abara apu, ui ge bakeuidare abele gedim Isaraelaem.

22 Epe E asoli Arekilao Iudaia Opole Heroda ra kes abara aba, abelelam E au geum ko bakeam abele; ege peike abi etomelu abele peim ge Adelaem, Ma bakeam abele ged Galilaiaem;

23 A E bakeam nerute uteb nei Nazareta E emerilu; ga akailu abele gaire perofeta ra mer, kega, E nei etkeroa Nazareta le.

3

1 Abele kerker Ioane, nei atker Bapataiso le, tabarki E marau abele Iudaia sumez ge,

2 Kega, Ma obazgeda, abelelam kotor baselaia maike.

3 Abelelam E dali Isaia perofeta detager, kega, Abele kodo le ereretikri abele sumez ge, Uaba paret Opole ra gab, a dirup abara gab.

⁴ Ege Ioane ra am uali kamela mus abara uak paur; abara leuer pem akerise ereger gako abele sumez isao.

⁵ Ui bakeuare abim Ierusalem a giz, gako Iudaia le uridili barkedilu Ioridano apek.

⁶ E uiabi bapataiso Ioridano ge, a uiaba natomertare uiaba uite giz.

⁷ E nardarare gaire Faresaio giz gako Sadukaio giz tabakeuare abim bapataisoem, E ui daratagerare, kega, Areg tabo ra omasker ae, nete uabi detomerta uaba deraret abele niai urker?

⁸ Uaba turum nagri abkoreb uaba obazgeda:

⁹ Uaba nole uabi dikiapore uaba nerkeplam, kega, Aberahama keriba aba; abelelam kaka uabi detager Ade umele depegeli baker peike ko Aberahama ra omasker.

¹⁰ Abele deumerupikeub tulik ikedilu maike lu giz ge; gaire lu uridili nole debe turum, E deregeir a dikri ur ge.

¹¹ Kaka uabi bapataiso abele ni iaueakai uaba obazger; epe nerute le kari keubu ekas E au kale kari tumge, kaka nole abkoreb tais abara teter gab; E uabi bapataiso abele Lamar Zogo, gako abele ur;

¹² Abara tag nagri pat, E dirup abara kon etkemed; a E ais azig metaem gaire kon nole puip kak, ege kon ra gegur E disirkilu abele ur umer kak esameilu.

¹³ Jesu bakeamulu Galilaialam Ioridano ge Ioaneim, iauaekai E abi bapataiso.

¹⁴ Ioane de abi daisumdal, kega, Debele ma kari bapataiso, nako ma tabakeam karim?

¹⁵ Iesu etkalu abim, kega, Ma no bapataiso karim, abelelam abkoreb meribim bakedida gaire gelar barkak uridili; E mena abi asoli.

¹⁶ Ege E Iesuim bapataiso E tegemelu nilam dasmer, ege kotor nakesmulu, E erdalu Ade ra Lamar tabu mokakalam dibadib ise emerder abi kerem ge;

¹⁷ Dasmer, abele kodo mer kotorlam, kega, Kara Uerem nase ge idali, kaka au sererege abim.

4

¹ Ege Iesu ais abele sumez ge abele Lamar de, iaueakai diabolo abi mirem.

² Iesu baueru foate gaire gerger a foate gaire ki, E keubu uererege.

³ E toabukilu abele le mirem, kega, Ese mama Ade ra Uerem, ma detager gaire baker a depegire leuer ise.

⁴ E etkalu, kega, Emetu detarare, Nole leuer tepteb le eded, epe Ade ra mer uridili etomeret abi telam.

⁵ Ege diabolo ko egaredelu Iesu abele zogo uteb, E ekueilu abele zogo meta tot ge,

⁶ E abi detager abim, Ese mama Ade ra Uerem, ma eupemar a ekueilu sepge, abelelam emetu detarare, E abi mer tigri abara angela giz uiaba mari egared uiaba taglam, nole mara teter itur nerute baker ge.

⁷ Iesu abi detager abim, Emetu detarare, kega, Ma nole mirem abele Opole mara Ade.

⁸ Ege diabolo ko ais abim abele au pereper paserem, E abi etomeret abim gesep baselaia uridili, gako uiaba debe lu giz;

⁹ Ege E abi detager abim, Kaka mari nakuar marim gaire lu uridili, ese mama kari erkepsam a esorgiru.

¹⁰ Iesu abi detager abim, Ma adem bakeam Satana, abelelam emetu detarare, Mama abi esorgiru abele Opole mara Ade, E tepeteb mama abi memeg le.

¹¹ Ege diabolo abi dikaer, dasmer, epe angela tabarki abi memeg le giz abim.

¹² Iesu asoli Ioane asirikilu abele au dubare meta, epe E bakeamulu Galilaiem.

¹³ Eabi dikaer Nazareta, E bakeamulu a emerilu Kapernaumge maike gur tauer ge, abele Sebulona a Nafatali ra nener.

¹⁴ Iaeakai bakedida abele mer Isaia perofeta, kega,

¹⁵ Abele ged Sebulona, gako abele ged Nafatali, abele gab abele gur ge Ioridano apek, Galilaia nogle giz ra ged;

¹⁶ Abele le giz emerilu kupikupi ge uiaba erdali abele au be; uiaba le giz emerilu abele ged gako abele eud mar, uiaba erdali abele be batoamerti.

¹⁷ Abele kerker Iesu ditimeda ko marau, kega, Uaba obazgeda; abelelam kotor baselaia maike.

¹⁸ Iesu ekasereder maike abele Galilaia gur ge, E abi erdali neisi le, Simona abara nei Peteru, gako Anederea abara keimer, uiaba net bataueret abele gur ge; abelelam ui darali umele larem.

¹⁹ E uiabi detager, Ua kari narmili, kaka uaba depegimelu le asaperem.

²⁰ Ui darali dikaerei uiaba net a abi irmilei.

²¹ E dikaer abele uteb, E ko erdali nerute neisi le Iakobo Zebedaio ra uerem, gako Ioane abara

keimer, abele nar ge gako uiaba aba Sebedαιο, uiaba ko euer uiaba net atoatelam; E uiabi darabgeri neisi le.

²² Uiaba sobkak dikaerei abele nar gako uiaba aba, a abi irmili.

²³ Ege Iesu deraueilu Galilaia uridili, E uiabi ereuerem uiaba sunago giz, E natomertare debe mer abele baselaia ge, a idigiri gim le giz gako asiasi gim abele ged uridili.

²⁴ Ege abara mer esauer a aserare Suria uridili; epe uiaba taraisare abim gim le giz uridili a gaire tonar gim; gako uader le asiasi demoni giz uiabi dedkoli, a uader le paim gim gako le giz ibibi; E uiaba uridili nadgiri.

²⁵ Ege le lakub abi irmilare, gaire le Galilialam, a Dekapolelam, a Ierusalemalam, a Iudalialam, a Ioridano apek.

5

¹ Ege E darasmerare abele le lakub, epe E ogi abele paser ge, ege emerilu, epe abara kaimeg giz tabakeuare abim;

² Ege E uiabi detager a ereuerem uiabim, kega,

³ Uerkab uader le gebegeb nerkep; abelelam uiaba uteb kotor baselaia.

⁴ Uerkab uader le okasosok; abelelam nagri uiaba okadrased.

⁵ Uerkab uader le mapodan tonar; abelelam uiaba nagri gobar atagor abele ged.

⁶ Uerkab uader le uererege a niap ge abele barkak tonarlam; abelelam uiaba gem osmeda.

⁷ Uerkab uader le nagri nasenas; abelelam E uiabi ko nasenas.

⁸ Uerkab uader le og kak nerkep; abelelam uiaba abi erdali abele Ade.

⁹ Uerkab uader le demeger abele mapo-danuem; abelelam nei atkeroa Ade ra uerem giz.

¹⁰ Uerkab uader le dedkoli abele barkak tonarlam; abelelam uiaba nagri kotor baselaia.

¹¹ Uerkab uaba ese uiaba adud mer uabim, a uabi dedkoeda a bes mer uabim, a gaire adud uridili uabim karielam.

¹² Uaba sererege a bapereker; abelelam uaba nagri au bodomalam kotor baselaiaim; abelelam uiaba ikerare mokakalam gaire perofeta giz kekiam uabim.

¹³ Ege uaba gesep ra sol; ese sol nole kurabkurab a nade lu uaba kurabem? nolea nerute lu ko abkoreb ikerare no bataueret adem a le esapili.

¹⁴ Uaba gesep datki. Umer kak ispili abele uteb tumge paser ge.

¹⁵ Uiaba nole disirik abele lamepa, a iketilu muige abele kumete; epe iketilu abele lamepa ra uteb, iaueakai datki nagri le uridili abele meta ge.

¹⁶ Uaba datki mokakalam le la opem, iaueakai uiaba erdali uaba debe tonar, uiaba naospered uaba Aba emeri kotor ge.

¹⁷ Uaba nole dikiaporare kaka tabakeamud ko detui abele gelar, gako abele gaire perofeta giz ra mer; kaka nole tabakeamud ko detui, epe bakedida.

¹⁸ Abelelam a ageakar kaka uabi detagered, Eseamulu abele kotor ge gako abele gesep ge, epe nole aseamur kak abele iota, gako kebi uar mog abele gelar giz, a mena bakedida gaire lu uridili.

¹⁹ Dasmerare, ese le detui abele kebi gelar, a ereuerem le mokakalam, E nei eteker kebi kale abele kotor baselaia; epe ese le ikeli pako ereuerem abele, E nei eteker au kale abele kotor baselaia.

²⁰ Abelelam kaka uabi detagered, Ese nole aule uaba barkak tonar tumem abele gaire aotale giz gako Faresaio giz, umer kak uaba barot abele kotor baselaia ge.

²¹ Ua aserare gaire aule giz uiaba mer, Ma nole le ipit eumida; ese le ipit eumida nerute le, E bodomalam abele meratager.

²² Epe kakanale uabi detagered, Ese le tababu ueku abara boai, E nagri bodomalam abele meratager; ese le abi detager abara boai, Raka, E nagri bodomalam abele meratager; ege ese nerute le abi detager nerute le, Paim le ae, E nagri bodomalam abele ur Genaim.

²³ Ese ma abi ikuar mara zeku lu abele bao ge, epe ma ko dikiapore mara boai nagri nerute lu mari ueku,

²⁴ Ma dikaereti mara zeku lu abele uteb abele bao open, epe ma bakeam; kekiam abi itikubi mara boai, a ko takomed a ikuar mara zeku lu.

²⁵ Ma dudum abi itikubi abele le ezoli abara gaire lu mari dog, peirdi uaba okakis abele gab ge; iaueakai nole mari emarid abele meratager abele le ezoli abara lu, a ko mari emarid abele meratager tarima le, E tarima le mari emarid abele memeg le, a memeg le mari emarid abele audubare meta.

²⁶ Ageakar kaka mari detager, Ma umer kak ko esomed, pe bakedida abara mani.

²⁷ Ua aserare aule giz ra mer, Ma nole kogem;

²⁸ Epe kakanale uabi detagered, Ese le dasmer abele kosker E abi lag, E emetu kogem abim abara nerkep.

²⁹ Ese mara tuter pone mari nadkoli ma dekeamur a adem; abelelam debele nerute mog mara gem abi, a adud batauered mara gem kemerkemer Genaim.

³⁰ Ese mara tuter tag mari nadkoli, ma isimi adem, abelelam debele nerute mog mara gem abi, a adud batauered mara gem kemerkemer Genaim.

³¹ Uiaba mer kega, Ese le imud abara kosker, debele ko ikuar abim abele dituaki jauali;

³² Epe kakanale uabi detagered, Ese le imud abara kosker, epe nole ko kak, E abi namarik kogem; ese le ispilu abele amu kosker E dali kogem.

³³ Ua aserare aule giz uiaba nerute mer, Ma nole bes iskosi, epe ma abi ikuar abele Opole lu ma emetu iskosi;

³⁴ Epe kakanale, kaka uabi detagerare, Nole iskosi kak; nole iskosi abele kotor ge, abelelam Ade ra bao ge;

³⁵ Gako abele gesep ge, abelelam abele uteb ekueilu abara teter; gako Ierusalem, abelelam au Opole ra uteb.

³⁶ Ma nole iskosi mara kerem ge, abelelam ma umer kak dipegili netat mara mus ko kakekake a golegole.

³⁷ Epe uaba mer mokakalam, Uao, uao; Nole, nole; abelelam abele mer aule gaire mer, abara giz adudelam.

38 Ua aserare uiaba mer, Bodomalam abele pone, nerute pone, a bodomalam abele tereg nurute tereg;

39 Epe kakanale uabi detagerare, Uaba nole imara abele adud; ese nerute le mara tuter peik bage erese, ma ko batauerik nerute.

40 Ese le lagelage mari ikerare abele mer-atagerem, E ais mara gem uali, ma ikuar mara au gem uali.

41 Ese le mari bamesili abi kemem bakeamulu abele netat mail, ma ko bakeamulu abim neis mail.

42 Ma abi ikuar abele le mari damosare, ma nole adem dimu abele le lagelage damosare mani marielam.

43 Ua aserare uiaba kega, Ma abi nasenase abele le emerilu maike, a deralu abele le mari ueku;

44 Epe kaka uabi daratagerare, Uaba abi nasenase uiaba le giz uabi ueku, uaba debe mer ikuar uader le uabi adud mer egali, uaba abi nasenase uader le uabi deralu, uaba abi esorerapare uader le uabi bes mer gako uabi dedkoli;

45 Iaueakai uaba Baba emerilu abele kotor ge abara uerem giz uabim; E abi emarid abara lem uiabim uader le adud tonar, a uader le debe tonar, E abi emarida irmir ko abi uader le barkak tonar, gako uader le adud tonar.

46 Abelelam ese uaba abi nasenase uader le uabi nasenase, nalu uaba bodomalam nagri? nako telona giz nole ikerare mokakalam abele tonar?

⁴⁷ Ese uaba tepteb nasenase uaba boai, nalu lu aule uaba ikerare? nako telona giz nole ikerare mokakalam?

⁴⁸ Dasmerare, abkoreb uaba debe tonar kemerkemer, mokakalam uaba Baba emerilu kotor ge, E debele kemerkemer.

6

¹ Uaba nole nakuarare uaba nase lu le ra opem, iaueakai uiaba erdali ua mokakalam ikerare; ege nole uaba bodomalam nagri abielam uaba Aba emerilu kotor ge.

² Epe ike, ese ma abi nase lu nakuarare, ma nole maber dibiri mara opem mokakalam bes le giz a sunago ge, a gab ge, iaueakai le giz uiabi naosepereda. Ageakar kaka uabi detagereda, Uiaba nagri bodomalam.

³ Ese ma nakuarare uader nase lu, debele mara ber tag nole asmer kak abele lu mara tuter tag ikerare:

⁴ Iaueakai gaire mara nase lu nole le asmer kak; epe mara Baba dasmerauem abele lu mude ge, E mari ikuar paret kak mari bodomalam.

⁵ Ese ma abi esorerapare, ma nole mokakalam bes le giz; abelelam uiaba lagelag esorerapare sunago ge a gab uasuli opem gaire le, iaueakai gaire le uiabi darasmerare. Ageakar kaka uabi detagereda, Uiaba nagri bodomalam.

⁶ Ese ma esorerapare, ma ge bao mabi uteb ge, a dimi abara te, ege ma abi esorerapare mara Baba penoka dali ardar kak uteb ge; mara Baba E darasmerare abele ardar kak uteb ge, E mari nakuaroa paret kak mari bodomalam.

⁷ Ese uaba esorerapare nole mer mer ko etomeret mokakalam gaire nog le giz; abelelam uiaba dikiaporare ese gaire mer Ade uiabi nase ge.

⁸ Dasmerare, uaba nole mokakalam uiaba; abelelam uaba Aba ge erdar gaire lu uridili uaba nole nagri, a ua nole amosi kak.

⁹ Dasmerare, uaba esorerapare mokakalam: Keriba Aba kotor ge, zogoem mara nei.

¹⁰ Mamoro mara baselaia sepem uatabu. Ikeroa mabara lag abele gesep ge, mokakalam kotor ge.

¹¹ Keribi ikuar leuer abkoreb abele gerger.

¹² Adem dikri keriba uit, mokakalam keriba dikri ui uridili keribim dedkoeda.

¹³ Nole keribi tegeredare abele mirem; epe keriba ditkedarare uitelam; Abelelam mari dog baselaia, a adigir, a deseper, niai karem. Amen.

¹⁴ Abelelam ese uaba dikri le la uit; ege uaba Aba dali kotor ge adem dikri uaba uit.

¹⁵ Ese uaba nole dikri le la uit, uaba Abet nole ua dikri uaba uit.

¹⁶ Ese uaba leuer baili, nole opauzi mokakalam bes le giz; abelelam uiaba dedkoli uiaba op, iaueakai gaire le nardarare uiaba leuer baili. Ageakar ka uabi detagereda, Uiaba bodomalam nagri.

¹⁷ Ese ma leuer baili, ma idu desas mabara kerem; a dirup mara op;

¹⁸ Iaueakai gaire le nole ardar kak ma leuer baili, epe mara Aba penoka dali ardar kak uteb ge; a mara Aba E ua dasmerare abele ardar kak uteb, E mari etomer paret kak mari bodomalam.

19 Uaba nole aukase deraimerare uaba gesep lu, a nagri degem gako lee umele eseamulu, a nagri le eroam, E abi daiui a ko eroam:

20 Epe uaba aukase deraimerare uaba kotor lu, nole degem a nole lee umer kak eseamulu, nole le eroam, E abi daiui a ko eroam;

21 Abelelam abele uteb uaba lu nagri, a uaba nerkep abi dog.

22 Abele pone, gem ra lamepa; ese mara pone debele, a mara gem datki uridili.

23 Ese mara pone adud, a mara gem kupikup uridili. Dasmer, ese kupikup abele be muige mari dog, uaiai au kupikup!

24 Umer kak le memeg neis opole; abelelam E derar nerute le, epe E nase nerute le; ese nole, E ekpi nerute le ge, epe dituaki nerute le. Uaba umer kak memeg le Adim a gako mamona.

25 Abelelam kaka uabi detagereda, Uaba nole okadeskeda uaba eded, na leuer uaba eroare, a na ni uaba ereare; gako uaba gem na lu uaba ameara. Nako eded nole aule abele leuerlam, gako abele gem abele amelam?

26 Uaba dasmerare ebur giz epereda; uiaba nole saido dikri, a nole deregeir, a nole azig saido meta ge; epe uaba Aba, emerilu kotor ge, uiabi darasisieda. Nako uaba nole au debele uiabim?

27 Na le dali uaba umele abara okadeskeda, E asaimer abara eded netat kubita?

28 Nalugem uaba okadeskeda uaba am uali? Ua dikiaporare abele sumez goago, nako tonar omeilu; uiaba nole dorge a nole erat.

²⁹ Kaka uabi detagereda, Ege Solomona, gako abara au debe lu giz, E nole abara am uali mokakalam abele nerute uiaba.

³⁰ Ese Ade abi ikuar mokakalam am uali abele gaire lu ged sumez, eded abele gerger a ko batauered idim ge abele amei uteb, nako uaba nole au debe am uali nagri, uaba kebi oituli?

³¹ Dasmerare, uaba nole okadeskeda, gako mer mokakalam, Na leuer meriba aroare? a na ni meriba ere? a na am uali meriba amear?

³² Abelelam gaire lu peike gaire nogle giz deraimerare; abelelam uaba Aba penoka dali abele kotor ge, E dasmerauem gaire lu uridili abkoreb uabim.

³³ Ege uaba kekiam deraimerare abele Ade ra baselaia, gako abara barkak tonar, iaueakai uaba gaire lu uridili nagri.

³⁴ Dasmerare, uaba nole okadeskeda abele idim ge; abelelam okadeskeda idim ge abgerger abara lu, abkoreb abele gerger abara adud.

7

¹ Ua nole abi meratager kak nerute le, iaueakai E uabi ko nole meratager.

² Abelelam abele meratager ua abi meratager, E ko uabi meratager; abele tonar lu uaba abi detali, a E ko uabi detali.

³ Nalu ma abi dasmeri lu puipi mara le la pone ge, a ma nole umer kak abele au lu mara pone ge?

⁴ Nalugem ma detager mara le, Abkoreb kaka atperedelu lu puipi mara pone; dasmer, abele au lu nagri mara pone ge?

⁵ Mama bes le, kekiam batauereda abele au lu mara pone ge; iaueakai ma erdali paret kak abi atperedelu abele lu puiپی mara le la pone ge.

⁶ Nole abkoreb uaba ikuar abele zogo lu omai giz, a ua nole dikri uaba penina gaire borom giz ra opem, mena esapirda uiaba teter, a ko batauered uabi eregili mogamog.

⁷ Ua abi damsare, iaueakai uabi nakuarare; a uaba deraimerare, epe uaba erdali; a uaba abi dida mudumud iaueakai uabim diski.

⁸ Abelelam ese le abi damsare E nagri; abele le deraimer E abi erdali; a diski abele le abi dida mudumud.

⁹ Nete le uabim, ese mara uerem mari namosi aretoem, nako ma abi ikuar baker?

¹⁰ A ko mari namosi larem, nako ma abi ikuar tabo?

¹¹ Dasmerare, uaba adud le, ese uaba umele nakuarare debe lu uaba omasker giz, nako uaba Aba penoka dali kotor ge, nole uabi nakuarare au debe lu giz uiaba le abi damsare?

¹² Gaire lu uridili uaba lag le giz uabi ikerare, mokakalam uabi ikerare uiabim; abelelam abele gelar gako gaire perofeta giz.

¹³ Uaba barot abele kebi gab te ge; abelelam au te abele au gab te ge, a aule abele gab a gaire le ekaseredi bakeaud.

¹⁴ Abelelam kebi te abele gab te ge, a kebi kale abele gab a bakedida eded, a neis neis le erdali.

¹⁵ Ege uaba mamor dasmerare gaire perofeta bes, uiaba tabarki uabim mamoe am uali, epe muige arega luko uiabim.

16 Ua erdali uiaba turum. Nako le edobemeda uina moda abele lu daradar, pako suke abele lu zegerzeger?

17 Ege mokakalam debe lu giz uridili kepu debe turum, epe abele adud lu a ko adud turum nagri.

18 Umer kak debe lu nagri adud turum, umer kak adud lu a ko nagri debe turum.

19 Gaire lu uridili nole debe turum, a ismi batauerda abele ur ge.

20 Dasmerare, uaba erdali uiaba turum.

21 Umer kak barota kotor baselaia uiaba uridili kari mer mokakalam, Opole ae, Opole ae; epe abele le ikerare kara Aba ra lag penoka dali kotor ge.

22 Gaire le kari detagarare niai gerger, Opole ae, Opole ae, nako keriba nole perofeta mara nei ge? a mara nei ge ko keriba dituaki gaire demoni giz? a mara nei ge ko keriba ikerare gaire adigir?

23 Kaka paret kak detagerare uiabim, Kaka nole umer kak uabim; ua bakeuare adem karielam, uaba adud tonar.

24 Dasmerare, ese le asoli kara mer giz peike E ko ikeli, kaka abi babisdarie E pardale, E ikeli abara meta abele neid ge;

25 Epe irmir apu a dodo tabarki a uak uami abi abele meta ge; umer kak edibida, abelelam giz tumem abele neid ge.

26 Ese le asoli kara mer giz ike a nole ikeli, E babisdarie abele paim le, E ikeli abara meta tumem abele ue ge;

27 Epe irmir apu a dodo tabarki a uag uami abi abele meta ge; epe edibida barabeda mogmog.

²⁸ Iesu ra gaire mer eseamulu, epe gaire le lakub abi damared abara giz mer.

²⁹ Abelelam E ereuerem uiabim mokakalam le nagri sirdam, a nole mokakalam aotale giz.

8

¹ Iesu uatabu abele paerlam, epe abi irmili gaire le lakub.

² Dasmerare, nerute lepera tabarki a etkobeilu abim, kega, Opole ae, ese ma lag ma umele kari idigiri.

³ Ege Iesu ra tagu itirimuriklu a itutilu abim, E kega, Kara lag mari idigir. Epe sobkak idigir abara leper.

⁴ Ege Iesu abi detager, kega, Debele ma nole atomeret kak nerute le; a ma bakeamulu mabu, etomeret abele zogo le, a ma abi ikuar zeku lu mokakalam Mose ra gelar, atamelam uiabim.

⁵ Ege Iesu Kaperenauma tabarki, epe abele kerem le, abele netat handed le abara nosik, E tabaruk a abi damsare,

⁶ Kega, Opole ae, kara memeg le eidi meta ge gingim, abele kegar au asiassi.

⁷ Ege Iesu abi detager, kega, Mena kaka bakeamulu a abi idigir

⁸ Kerem le, netat handed le abara nosik, abi detager, kega, Opole ae, nole abkoreb ma tabakeam bao muige kara meta; epe netat mara mer tabarki, a idigir kara memeg le.

⁹ Abelelam kaka nerute le kari sirdam, a kaka sirdam abele gaire ares le; ese kaka abi detager nerute le, Ma bakeam, epe E bakeam; a nerute le,

Ma tabakeam, a ko tabakeam; pako kara memeg le, Ma ikeli abele lu, epe E ikeli.

¹⁰ Ege Iesu asoli, E au damared, E uiabim detagerare gaire le abi irmilare, kega, Ageakar kaka uabi detagerare, kaka nole erdali nerute Isaraela le nagri au oituli mokakalam.

¹¹ Kaka uabi detagerare kega, Gaire le tabakeuare naigerlam a siailam, ko kemem okakis eroare Aberahama, a Isaaka, a Iakobo, abele kotor baselaia ge:

¹² Epe ged kemle uerem giz uiaba imuare abele kupikup adige, a nagri au ebazuer a tereg ikukumared.

¹³ Ege Iesu abi detager abele kerem le, handed le abara nosik, Ma bakeam, mokakalam mara oituli, a ko ikeli marim abkoreb. Epe akaida abara memeg le abele haua ge.

¹⁴ Epe Iesu balu abele Peteru ra meta ge, E abi erdali abele apu Peteru ra kosker eidi abele uruuri gim.

¹⁵ E itutilu abele kosker ra tag, epe akaida abara uruuri gim; a E tekueilu abi memeg le uiabim.

¹⁶ Epe kikem, uiaba taraisare gaire le demoni barota; epe namuare adud lamar giz abele abara merlam, E idigiri uiaba gim le giz:

¹⁷ Iaueakai bakedida abele Isaia ra mer, kega, E ais meriba gebegeb, a ko bakuar meriba gim.

¹⁸ Ege Iesu dasmerare gaire le lakub abi derumeda, epe E uiabi detagerare, Ua bakeuare nerute apek.

¹⁹ Epe nerute aotale tabarki, a abi detager, kega, Ereuer le, kaka mari irmili gaire uteb ma bakeam.

²⁰ Ege Iesu abi detager, kega, Arobe nagri abara kur, a ebur giz epereda nagri uteb uteidi; ege Le la Uerem E nole abara uteb uteidi.

²¹ Ege nerute abara kaimeg giz abi detager, Opole ae, ma kari namarid kaka kekiam bakeam etkobei kara aba.

²² Ege Iesu abi detager, Kari narmili; a dikaer eud le giz uiaba etkobei eud le giz.

²³ E atiem abele nar, epe abara kaimeg giz abi irmilare.

²⁴ Dasmerare, abele au uag tabarki abele gur ge, epe gaire zauber etatakoi abele nar; a E uteidi.

²⁵ Epe abara kaimeg giz tabakeam, a abi itir, kega, Opole ae, ma uerkab keribim, a keriba maike nabaumer.

²⁶ Ege E uiabi detagerare, kega, Nalugelam uaba geum, uaba kebikebi oituli? Epe E tekueilu, a dasiumda abele uag pako abele gur, iaueakai au metalug.

²⁷ Ege uiaba le giz abi damared, kega, Au kale abele Opole, abelelam uag a gur aserei.

²⁸ Ege E bakeamulu nerute apek abele ged Geregese tabarki, ege obapitei neis le demoni badariei tabakeamlam aolam, uiaba au saserim, umer kak nerute le ekase abele gab ge.

²⁹ Darasmer, neis le ereretikri, kega, Nalu mara mer keribim, Iesu ae, Ade ra Uerem? Nako ma tabakeam ike keribim ikeli asiasi a nole bakedida abele niai kerker?

³⁰ Ege muriz ge abele gaire borom degemeli.

³¹ Uiaba demoni giz abi damsare, kega, Ese ma keribim imuare adige, ma keribim namarid gaire borom giz.

³² Ege E abi detager uiabim, Ua bakeuare. Ui ge baos adem, a bakeuare abele gaire boromaem; darasmerare, abele borom au isir baupamarti abele au uak gur ge, a baum eseamulu abele gur ge.

³³ Ege gaire le asisiem a koreder bamer, a baos abele uteb ge, a natomertare gaire lu uridili, a pako gaire lu ikeli neis le demoni dedkoli.

³⁴ Dasmerare, gaire le uridili tabarkare abele utebelam a obapitare Iesuim; uaiba abi erdarare, epe uiaba abi damsare, A ma bakeam adem keriba gedlam.

9

¹ Ege Iesu atiem abele nar ge, a bakeamulu nerute apek, epe baos tabara uteb ge.

² Dasmerare, uiaba egardare abim abele le ibibi, E eidi abele sik; Iesu abi nardarare uiaba oituli, epe E abi detager abele le ibibi, Kara uerem ae, mara nerkep ua saserim, emetu adem dikri mara uit.

³ Dasmerare, uader aotale le tababu dikiaporare uiaba nerkep ge, Abele le adud mer egali Adim.

⁴ Ege Iesu de nardarare uiaba dikiaporare, epe E uiabim, kega, Nalugelam uaba adud dikiaporare uaba nerkep ge?

⁵ Abelelam nade lu perper? nako abele mer abi detager, Mara uit emetu idigir; a nako abele mer abi detager, Tekuei, ma ge bakeam?

⁶ Ueakai uaba opasereret Le la Uerem nagri sirdam abele geseb ge E idigir uit giz, (E abim detager le ibibi), Ma ge tekuei, a ais mabara sik, a bakeam mabara meta.

⁷ E ge tekueilu, a bakeamulu tabara metaem.

⁸ Epe le lakub abi erdarare, uiaba sererege, a desperare Adim, E nakuarare abele sirdam le mokakalam.

⁹ Ege Iesu bakeamulu adem abele utebelam, epe E erdali abele le emreder abele meta ge a asesereder zegu mani, abara nei Mataio; E abi detager, Ma kari narmili, ege E tekueilu, a abi irmili.

¹⁰ Ege E sep ge eidi abele meta a leuer eroli, dasmerare, gaire telona giz a pako uite le giz a tabakeuare uiaba eidi okakis Iesuim, pako abara kaimeg giz, a leuer erolare.

¹¹ Faresaio giz abi erdali, uiabi abi detagerare abara kaimeg giz, Nalugelam uaba Ereuerem le kemem leuer eroli a gaire telona giz pako uite le giz?

¹² Ege Iesu asoli, E uiabi daratagerare, Nole abkoreb lukup le gaire gim kak le, epe mamoro abkoreb gaire le gimim.

¹³ Ua bakeuare a ereuerem nalu tonar abele mer, Kaka lagelag abele nasenas, a nole abele zegu lu; abelelam kaka nole tabarki darabgerare gaire le barkak tonar, epe uite le giz uiaba obazgeda.

¹⁴ Ege Ioane ra kaimeg giz tabakeuare abim, kega, Nalugem keriba gaire kerker leueru baili, a pako gaire Faresaio, epe mara kaimeg giz nole leueru baili?

15 Ege Iesu de uiabi daratagerare, Umer kak okasosok gaire kaimeg le, abele le kerkar ispit abara kosker, abele uader gerger uiabi kemem, a niai kerker tabarki le ispit adem bakeamulu uiabelam, epe uiaba leueru baili.

16 Nole nerute le umele ekpi emeret gem uali abele kerkar mog uali; abelelam atoat abele emeret gem uali abara ekpi, iaueakai au atoata-toat.

17 Umer kak kerkar uaina etatakoi abele emeret gegur tarpor: ese mokakalam gegur tarpor erperidlu, a uaina epaiteredlu, a gaire gegur tarpor dedkoli: epe etatakoi abele kerkar uaina abele kerkar gegur tarpor, iaueakai mamoro debele.

18 E uiabi daratagerare abele gaire mer, Dasmer, abele kole tabarki E abim etkobeilu, kega, Kara neur emetu eumida; a ma tabakeam a dikmerik mara tagu abara tumge, iaueakai eded.

19 Ege Iesu tekueilu, a abara kaimeg giz abi irmilare.

20 Dasmer, abele kosker E nagri mam gim tuelf gaire urut, E bakeamulu Iesu ra sor ge, a abi itutilu abara am uali ub ge.

21 Abelelam E tababu dikiapor muige abara nerkep, Ese kaka no itutilu abara am uali, a kara eded nagri.

22 Ege Iesu baseker, a abi erdalul, E detager, kega, Kara neur, mara nerkep au saserim, a ma eded maba oitulam. Ege abele kosker eded abele haua ge.

23 Ege Iesu balu abele kole ra meta ge, E darasmerare gaire lekub a burar diperi a uiaba ebazuer,

24 E uiabi daratagerare, Ua bakeuare adem; abelelam abele neur nole eud kak, E no uteid. Ege uiaba abi neg degarare abim.

25 Ege lekub namuare, a E balu, a erpeilu neur ra tag; ege ekueilu abele neur.

26 Abele mer aserare abele ged uridili.

27 Iesu adem bakeamulu abele utebelam, epe uiaba abi narmilei neis sadamer le, a ereretikri, kega, Dauida ra Uerem, ma keribi nasenas.

28 E balu abele meta ge, a neis sadamer le tabakeamulei abim; a Iesu uiabi daratager neis le, Nako uaba karim oituli kaka umele abele lu ikeli? Epe uiaba detaut, Uao, Opole.

29 Ege E uiabi natutilu uiaba pone, a uiabi daratager, kega, Mokakalam uaba oituli, a ko ikeli abkoreb uabim.

30 Ege uiaba pone bakaerei; ege Iesu de au kase daratager neis le, kega, Uaba nole atomeret kak nerute le.

31 A neis le bakeamulei, a merkem abele mer abielam abele ged ge uridili.

32 Neis le bakeamulei; darasmerare, uiaba tegaret abele le te dabimdabim a demoni ko balu muige.

33 E abi imuare abele demoni; ege le mamoro mer etakalu, abele le te dabimdabim: ege lekub uiaba abi damarare, a mer detagerare, kega, Emeretalam meriba nole erdali nerute lu mokakalam Isaraela ge.

³⁴ A Faresaio giz abielam detagerare, kega, Abele au demoni abi dog, abelelam E umele namuare demoni giz.

³⁵ Ege Iesu deraueli gaire utebe uridili pako kebi utebe, a ereuerem uiaba sunago ge, a marau abele baselaia ra debe mer, E nadgirare gim le uridili, pako au asiasi gim le abele ged ge.

³⁶ E nardare gaire lekub, epe E au nasenase uiaba, abelelam uiaba au sagim a dekaertare, mokakalam mamoe giz nole le asesered kak.

³⁷ Ege E uiabi detagerare, abara kaimeg giz, Epe gaire abele saido isimare, a no neis neis le dorge;

³⁸ Peike uaba damsare abele Opole, abara saido isimare, E ko namarkare uader le dorge abara saido isimare.

10

¹ Ege E darabgerare abara kaimeg giz tuelf le, E uiabi nakuarare abele sirdam gaire adud lamar, a ko namuare uiabi, pako nadgirare gim le uridili, a pako au asiasi gim uridili.

² Uiaba nei gaire apostolo tuelf le; a kekiam, Simona, abara nei Peteru, a Anederia abara keimer; a Iakobo Zebedaio ra uerem, pako Ioane abara keimer;

³ Filipo, a Batolomaio; a Toma, a Mataio telona le; a Iakobo Alefaia ra uerem, pako Lebaio abara nei Tadaio;

⁴ Simona Kanana le, pako Iuda Isakariota, E abi keserkeser.

⁵ Ege Iesu de namarkare uiaba tuelf le, E uiabi daratagerare, kega, Uaba nole bakeuare abele

gab uiaba nogle giz, a ua ko nole bakeuare gaire Samaria utebem;

⁶ A debele ua bakeuare gaire mamoe Isaraela ra boai badimirida.

⁷ A ua bakeuare, a marau, kega, Kotor baselaia maike.

⁸ Ua nadgirare gim le giz, a darapare lepera le, a nakiamare eud le giz, a daramuare demoni giz: uaba turum nagri, a uaba ko naisuerare.

⁹ Uaba nole gol, a silua, a baras uaba uak:

¹⁰ Ua bakeuare nole aisare epei, a nole neis am uali, pako teter gab, a koket; abelelam abkoreb ikuar leuer abele le dorge ikeli.

¹¹ Ese uteb pako kebi uteb ua baos, nautumerare nade abele le emeri abkoreb, a ua bameroa a ko bakeuare.

¹² A ua barota nerute boai ge, uaba uiabi sererege a tag deguat.

¹³ Ese abkoreb abele boai, a ua ko nakuarare uaba debe mer; ese abele boai nole abkoreb, iako takomeda uabim uaba debe mer.

¹⁴ Ese le nole agared kak uabim, a nole asor kak uaba mer, a ua bakeuare adem abele metalam pako abele utebelam, uaba tekuei a teter gab ditkeda sep uaba teterlam.

¹⁵ Ageakar kaka uabi detagered, Abele itimer gerger kebi bodomalam Sodomaem a Gomoraem tumem abele uteb ge.

¹⁶ Dasmer, kaka uabi demarida mokakalam mamoe giz eipu gaire luko giz; abelelam uaba pardali mokakalam tabo, a au mapodan mokakalam lupe.

17 A ua bako le giz: abelelam uiaba uabi demarida abele mer atager, a ko uiaba uabi demarida uiaba sunago ge,

18 A uabi eguatumur tarima le a opole uiaba opem karielam, a ikeli ageakarem uiabim pako uiabim nogle giz.

19 Ese uiaba uabi demarida, uaba nole okadeskeda nako a nalu uaba mer detaut; abelelam E uabi etomeret abele haua ge nerute mer uaba detaut.

20 Abelelam uaba nole detaut, epe uaba Aba abara Lamar zogo detaut muige uabim.

21 Nerute le tabara narbet namarida ko eumid, a aba namarida abara omasker: a omasker giz tekue uiaba aba, iaueakai uiabi ipiti eumid.

22 Gaire le uridili uabi derar kara neilam; epe abele le niaiem tekuei bakedida mop ge, E ko eded.

23 Ese uiaba uabi dedkoli nerute uteb, a ua ko kored bakeuare nerute utebem; abelelam a ageakar kaka uabi detagereda, Umer kak uaba basiki Isaraela ra uteb uridili, mena Le la Uerem tabarki.

24 Nole aule ereuer le tumem abele le abi ereuerem, a ko nole aule abele memeg le tumem abara opole.

25 Au debele okakis ereuer le mokakalam abele le abi ereuerem, a ko abele memeg le mokakalam abara opole. Ese uiaba nei atker abele boai ra opole Bezebul, nako uiaba nole ikeli mokakalam abara boai?

26 Dasmerare, uaba nole geum kak uiabim; abelelam nole nerute lu ispili, a umele paret

kak etomeret; a nole nerute lu mud ge, a umele etomeret.

²⁷ Ege kara mer uabi detagereda kupikup ge, a uaba etomeret abele datki: a abele mer ua aserare uaba grip ge, a uaba etomeret tumem meta.

²⁸ Uaba nole geum uader le uaba gem ipit eumid, a umer kak uiaba ipit eumid uaba lamar; a mamoro uaba geum abele le E umele dedkoli abele lamar pako gem Genaim.

²⁹ Nako nole bodomalam neis kebi ebur abele asari? nole nerute abi abele sep ge a uaba Aba mamoro dasmeri.

³⁰ A uaba mus uridili emetu etager.

³¹ Peike uaba nole geum kak, uaba aule tumem gaire kebi ebur giz.

³² Dasmerare, ese le kari etomeret gaire le la opem, a kaka ko etomeret abim kara Aba ra opem abele kotor ge.

³³ Ese le kari asared le la opem, a kaka ko asared abim kara Aba la opem penoka kotor ge.

³⁴ Uaba nole dikiaporauem kaka tabarki dekuarare mapodan abele geseb ge; kaka nole tabarki dekuarare abele mapodan, epe abele teibur aosos tulik.

³⁵ Abelelam kaka tabarki dekuarare ueku abele le pako abara aba, a pako abele neur uerem ko ueku abara apu, a abele kosker ueku kimiar ra apu;

³⁶ A ikeli le abara boai ko abi kurab ge.

³⁷ Abele le au nasenas abara aba pako abara apu a E kebi omare karim, nole karim abkoreb; a abele le au nasenas abara uerem, pako abara neur, a E kebi omare karim, a ko nole abkoreb.

³⁸ Ese le nole ais abara satauro, pako nole kari narmili, nole karim abkoreb.

³⁹ Abele le erpei abara eded, a ko abi abielam; ege abele le dedkoli abara eded karielam, a ko nagri.

⁴⁰ Abele le uabi egared, E kari egared, abele le kari egared, a E egared abele le kari namarid.

⁴¹ Abele le egared nerute perofeta a perofeta nei ge, E nagri bodomalam abele perofetalam; a abele le egared nerute le barkak tonar a le barkak tonar nei ge, E nagri bodomalam abele le barkak tonar.

⁴² Ese le abi ikuar no ni gebegeb abele tanelu ge abim nerute kebile ko eri, abele nei kaimeg giz, ageakar kaka uabi detagered, Nole abu kak abara bodomalam.

11

¹ Emetu Iesu mer tigri abara kaimeg giz tuelf le, ege E adem bakeamulu abele utebelam, a ereuerem pako etomeret uiaba utebim.

² Ege Ioane asoli abele audubare meta ge Keriso ra dorge, epe E abi namarida neis abara kaimeg giz,

³ A abim kega, Nako mama le tabarki, a nako keriba ko naokaili nerute le?

⁴ Ege Iesu uiabi daratager, kega, Ua bakeamulei a etomeret Ioaneim a gaire lu uaba asoli, pako dasmeri:

⁵ Gaire le pone asadamer bakaerti, uader le ibibi nakasiri, a lepera idigir, pako grip batapili a asoli, uader le eumid ko eded akaida, a etomeret abele debe mer uiabim gaire lu kak le.

6 E gaire debe lu nagri abele le, nole kari asared kak.

7 Uiaba bakeamulei, ege Iesu uiabim marau le lakub Ioaneialam, Nalugem uaba bakeuare a dasmerare abele sumez ge? Nako abele mebud uag demali?

8 Nalugem uaba bakeuare a dasmerare? Nako abele le am uali gebegeb uali? Dasmerare, uiaba am uali gebegeb am uali, bameri opole ra meta ge.

9 Nalugelam uaba bakeuare dasmerare? Nako perofeta? Ageakar kaka uabi detagerare, E aule tumem perofeta.

10 Abelelam E pedali, mer detali abim, Dasmer, kaka namarid kara merkem mara opem, E paret mara gab mara opem.

11 Ageakar kaka uabi detagered, Nole nerute le tekuei a esmelu kosker giz, aule tumem Ioane Bapataiso, epe abele le kebi kale abele kotor baselaia, E aule tumem abim.

12 Ditimedlu Ioane Bapataiso ra kerker a bake-did peirdi, kotor ra baselaia gaire le etager, a uiaba saserim le etager ais.

13 Abelelam gaire perofeta giz mer detautarare, pako abele gelar giz bakedid Ioaneim.

14 Ese uaba lagelag abi egared, a Elia pedali, E emeretalam naokaili ko tabarki.

15 Abele le grip nagri asoli, debele E asoli.

16 Nalu kara mer babisdarie abele nosik le? Mokakalam kebile giz, uiaba bamer abele zegur uteb ge, uiaba darabgerare uiaba kaimeg,

17 Kega, Keriba uabi burar diberi, a uaba nole ginar keribim; a keriba uabi ebazuer, a uaba nole ebazoli op detapili keribim.

18 Abelelam Ioane tabarki E nole eroli a nole eri, ege uiaba mer abim, E nagri demoni abi dog.

19 Ege Le la Uerem ko tabarki E eroli a eri, ege uiaba mer abim, Dasmer, E au leuer lag, a au lagelag uaina eri, a telona ra kaimeg pako uit le giz! Epe nei atker abele pardale barkak tonar abara omasker.

20 Ege E dauersili gaire uteb ikerare gaire abara adigir, abelelam uiaba nole obazgeda kak.

21 Korasina ae; kaka au nasenase marim! Betsaida ae; kaka au nasenase marim! abelelam, ese ikerare gaire adigir Turo a Sidonaim emeretlam, uiaba obazgeda abele zegezgerger uali pako abele bi.

22 Peike kaka uabi detagerare, Kebikebi Turo a Sidona abele gerger itimer uabim.

23 Mama Kaperenauma, ko agisilu bakedid kotor ge, a ma ko abi batauered muige abele seol; abelelam ese ikerare Sodomaem gaire adigir mari dog, E mena niai tekuei bakedid peirdi.

24 Peike kaka uabi detagerare, Kebikebi abele ged Sodoma abele gerger itimer marim.

25 Peike abele haua ge Iesu abi detager, kega, Kaka marim esoao, kara Baba ae, kotor Opole pako geseb ge, abelelam ma ispi gaire lu ike gaire pardale le giz pako umele le, a ma etomeret gaire lu ike uiabim gaire uerem giz:

26 Peike kara Baba ae, abelelam mara lag mokakalam.

²⁷ Kara Aba kari nakuarare gaire lu uridili; nole le erdali abele Uerem, epe abele Aba; a nole le erdali abele Aba, epe Uerem tepteb, pako nerute le Uerem lagelag abi etomeret.

²⁸ Ua karim tabakeuare uaba au asiassi, a peper lu baguarare, a kaka uabi ikuar sagim kak.

²⁹ Uaba baguare kara lu bao, a pako uaba kari ereuerem; abelelam kakanali le gebgeb nerkep a mapodan: iaueakai uaba lamar nagri nerezili utebe ge.

³⁰ Abelelam kara lu bao nole peper kak, a kara lu nole sagim kak.

12

¹ Abele kerker, Iesu nakas kon gedub ge abele sabath; abara kaimeg giz uererege, uiaba tagpote ismi kon ra pote a uiaba eroli.

² Ege Faresaio giz uiabi erdali, a uiaba kega abim, Dasmer, mara kaimeg giz ikerare abele lu nole abkoreb sabath ge.

³ E uiabim detagerare, Nako uaba nole etagare kak abele lu Dauida ikeli E uererege, pako gaire le abi kemem;

⁴ E balu Ade ra meta a eroli areto didmerik opem, E nole abkoreb teroli, pako gaire le abi kemem, a tepteb gaire zogozogo le giz?

⁵ Nako uaba nole etagare abele gelar ge, gaire sabath uridili zogozogo le datupid abele sabath muige abele zogo meta, a uiaba nole adud kak?

⁶ Kaka uabi detagerare, Ike abele le aule tumem abele zogo meta ge.

7 Ese uaba umele tonar abele mer, Kaka au lagelag abele nase, a nole abele zegur lu, uaba nole bodomalam le nole adud kak.

8 Abelelam Le la Uerem sabath Opole.

9 E bakeamulu abele utebelam, ege E balu uiaba sunago ge:

10 Dasmer, abele le abara tag euselu, epe uiaba abi itimer kega, Nako abkoreb le idigir sabath ge? iaueakai uiaba ko nagri mer ais abielam.

11 Ege E uiabi detagerare, Nete le uabim, nagri netat mamoe, ese ekesmeri abele au uak sabath ge, nako E nole ko etaruk abele au uaklam?

12 Nako le nole aule abele mamoe? Peike abkoreb debe tonar abele sabath ge.

13 E abi detager abele le, Mara tag idrimurik. Epe abara tag idrimurik, a ko debele mokakalam nerute.

14 Faresaio giz baosi adige, uiaba mer atager abim ko abi ipit eumid.

15 Ege Iesu erdali, epe bakeamulu adem abele uteblam; a gaire le lakub abi irmilare, E uiabi uridili idigir,

16 E uiaba aukase detagerare nole abi atomeret kak:

17 Iaueakai bakedida abele perofeta Isaia ra mer, kega,

18 Dasmer, kara memeg le kaka dabgiri, kaka abi nase ge, a abim sererege kara nerkep; kaka abi ikuar kara Lamar abi tumge, E etomeret abele meratager uiabim gaire nogle giz.

19 E nole asareda, E nole ereretikri, a nole nerute le asoli abara kodo mer abele gab ge.

²⁰ E nole narbeid abele mebud pakesa, E nole asameida abele uik kebikebi datki, a mena E upinati abele meratager ko saserim.

²¹ Abara nei ko abi oituli abele gaire nogle giz.

²² Ege tais abim abele le demona balu muige, abele le E sadamer, a E ko te dabimdabim: E abi idigir, a mamor mer etkalu, a ko dasmer, abele le sadamer pako te dabimdabim.

²³ Ege gaire le lakub uridili abi damered, a uiaba mer, kega, Nako nole Dauida ra Uerem pedali?

²⁴ Gaire Faresaio giz aserare, a uiaba mer abielam, Ese nole Bezebul demona giz opole, umer kak abele le demona imud.

²⁵ Ege Iesu opasereret uiaba dikiaporare, E uiabi daratagerare, Gaire baselaia uridili ese kurabkurab a uekueku, nole niai tekuei, a sobkak eseamulu; a gaire uteb uridili, pako boai giz, ese kurabkurab a uekueku, nole niai tekuei.

²⁶ Ese Satana imuare Satana, ege abi kurabkurab, a uekueku abim; Nako niaiem tekuei abara baselaia?

²⁷ Ese kaka imuare demoni giz Bezebulelam, a nete imuare demoni uaba omasker giz? abele lu peike ikeli uiaba meratager uabim.

²⁸ Ese Ade ra Lamarlam kaka imuare demoni giz, emetu bakedid uabim Ade ra baselaia ge.

²⁹ Nako umele nerute le balu abele saserim le la meta, a ko itkamer abara lu? mena kekiam didbare abele saserim le, epe itkamer abara lu abara meta ge.

³⁰ Abele le nole kari lakak E nole kari kemem; Abele le nole etami kari dog, a ko debek.

³¹ Abele lu kaka uabi detagerare, Uit uridili pako adud mer, umele idigir lelam; ege abele le adud mer abele Lamar, umer kak le idigir.

³² Ese le abi adud mer abele Le la Uerem, umele idigir; ege abele le abi adud mer abele Lamar zogo, umer kak idigir abele eded, pako niai eded.

³³ Uaba nei atker abele debe lu, a ko debele abara turum; ese nole, uaba nei atker abele adud lu, a ko adud abara turum; abelelam turum atamelam gaire lu.

³⁴ Tabo ra omasker ae, uaba le au adud, nako uaba umele debe mer egali? Abelelam gaire lu le la nerkep ge, a ko te detaut.

³⁵ Gaire debe lu tais abele le debe tonar abara lu muige abara nerkep; ege abele le adud tonar ko tais gaire adud lu, abara adud lu muige abara nerkep.

³⁶ Kaka uabi detagerare, Gaire kebi mer uridili le detaut, uiaba etomeret abele gerger meratager.

³⁷ Abelelam mara mer barkak mari desperet, a mara mer ko mari desauersili.

³⁸ Ege uader aotale le pako Faresaio giz, kega, Ereuer le, keriba lagelag ma detomertare nerute atamelam mabelam.

³⁹ E etkalu uiabim, kega, Abele nosik adud le pako eruam sus uiaba karim deraimer nerute atamelam; ege umer kaka uiabi dekuarare, a tepeteb Iona perofeta ra atamelam:

⁴⁰ Abelelam mokakalam Iona muige abele au lar kem ge neis netat gerger ge, a neis netat ki ge; mokakalam Le la Uerem ko muige sep ge neis netat gerger ge, pako neis netat ki ge.

⁴¹ Nineua le ko tekuei abele gerger meratager kemem abele nosik adud le pako eruam sus abkoreb; abelelam uiaba obazged Iona ra marau; dasmer, ike abele le aule tumem Iona.

⁴² Kosker opole koki apek ko tekuei kemem abele nosik abele meratager; abelelam E tabarki abele bakedid geseb ge, a asoli Solomona ra pardale; dasmer, ike abele le aule tumem Solomona.

⁴³ Ese osmeda adige abele adud lamar lelam, E degemeli abele ni kak ged, a deraimer nerezi uteb, a nole erdali.

⁴⁴ E detager, kega, Kaka ko akomeda karabara meta, emeret kaka emeri; E bakeam a erdali nole le kak, a emetu paret dirup.

⁴⁵ Ege E bakeamulu, a taraisare uader sefen lamar au adud abi tumge, ege uiaba barot a bamer; ege au adud mop abele le, a kebi adud abara giz. Mokakalam ikeli abkoreb abele nosik le adud.

⁴⁶ E uiabi detaut abele le lakub, dasmer, ekuei adige abara apu, pako abara keimer giz, uiaba lagelag abi mer atager.

⁴⁷ Ege nerute le abi detager, Dasmer, ekuei adige mara apu, pako mara keimer giz, uiaba lagelag mari mer uanatager.

⁴⁸ E abi etkalu, kega, abele le abim detager, Nete kara apu? a nete kara keimer?

⁴⁹ E tabara tag idrimur tabara kaimeg giz, kega, Dasmer, kara apu, pako kara keimer giz!

⁵⁰ Abelelam abele le ikeli kara Baba ra lag penoka kotor ge, E dali kara keimer, pako kara berbet, a kara apu.

13

¹ Abele gerger Iesu esomelu abele metalam, a emeri seb ge, maike abele gur ge.

² Ege gaire le lakub netat gedim abim, abelelam E bakeam ekauerti abele nar, a emeri, a gaire le lakub uridili tekuei abele gur dege.

³ E uiabim daratagerare gaire lu mer babisdarie, kega, Dasmer, nerute amorda le bakeamulu ko emor.

⁴ Ege abara saido dikri, epe uader kep abi abele gab ge, ege gaire ebur giz epereda eroli.

⁵ Uader kep abi abele uteb neid ge, kebi sep nagri; ege dudum erperida, abelelam abele sep kebi kale;

⁶ A lem eupumada eueri; a uatuet, abelelam nole sip kak.

⁷ Uader kep abi abele sumez lu daradara; a gaire sumez lu daradara omeida a detarapi.

⁸ Epe uader kep abi abele debe sep ge, epe turum nagri, uader handed, a uader sikesti, a uader therti.

⁹ Abele le grip nagri ko asoli, debele E asoli.

¹⁰ Ege abara kaimeg giz tabaruka abim, a abim kega, Nalugem ma uiabim detagereda no mer babisdarie?

¹¹ Ege E etkalu uiabim, kega, Uabi ikuar, iaueakai uaba umele gaire gumik lu abele kotor baselaia ge, a uiabi nole akuar kak.

¹² Abelelam abele le nagri lu, a ko abim ikuar, ege abara gaire lu dordor; a abele le nole lu kak, a ais abielam abele lu.

¹³ Abele lu kaka uabi detagereda mer babisdarie; abelelam uiaba dasmer, a nole dasmer; a

uiaba aserare, a nole aserare, pako uiaba nole akiapor kak.

¹⁴ Ege bakedidlu uiabim Isaia ra mer daratagerare, kega, Uaba aserauem, a nole asoli, a uaba no dasmer, a nole erdali:

¹⁵ Abelelam gaire le la nerkep abele ged au dobodob, pako asor kak uiaba grip, a uiaba pone esameida; ege nole asmer kak uiaba pone, pako asor kak uiaba grip, iaueakai uiaba nerkep nole asor kak, a depegili uiaba, a kaka ko ikuar eded akaida.

¹⁶ Urkab uaba pone, abelelam uaba dasmerare, pako uaba grip, abelelam ua aserare.

¹⁷ Abelelam ageakar kaka uabi detagereda, kega, Gaire perofeta, pako le barkak tonar, uiaba au lagelag dasmerare gaire lu uaba erdali, a nole ardar kak; a uiaba ko lagelag aserare abele gaire lu ua aserare, a nole asor kak.

¹⁸ Dasmerare, ua aserauem abele tonar mer babisdarie abele le saido dikri.

¹⁹ Ese le asoli abele baselaia ra mer, ese nole akiapor kak, ege adud le abim tabarki, a ais adem abele saido emetu dikri abi nerkep ge. Abele le pedali egared abele saido abele gab ge.

²⁰ Epe abele le egared abele saido tumem neid ge, abele le E asoli abele mer, a sobkak egared pako sererege;

²¹ Ege nole sip kak abim, a nole niaiem ekue; abelelam menaba asiasi a dedkoli abele merlam tabarki, E sobkak upiditilu a ekesmeri.

²² Abele le egared abele saido abele sumez lu daradar, abele le E asoli abele mer, epe abara nerkep okadeskedi gaire lu abele gesep ge, pako

abele bes lu lag a edarabi abele mer, epe nole turum kak.

²³ Ege abele le egared abele saido debe seb ge, abele le E asoli abele mer, a erpei; a turum nagri, uader uan handed, a uader sikesti, a uader therti.

²⁴ E ko etomeret uiabim nerute mer babisdarie, kega, Kotor baselaia mokakalam nerute le debe saido dikri abi ged ge:

²⁵ Le giz uteid, ege kurab le tabakeam, a dikri abele ditania muige abara saido, ege E bakeamulu adem.

²⁶ Abele saido barperida, a turum nagri, ege erdalul abele ditania.

²⁷ Ege tarim le la boai, abara memeg le, tabarki, a abim kega, Opole ae, nako ma nole dikri abele debe saido mabi ged ge? Dasmer, nagelam abele ditania?

²⁸ Ege E uiabi daratagerare, Abele lu nerute le kari kurab ge ikeli. Ege abara memeg le abim detaut, kega, Nako ma lagelag keriba bakeuare ismi adem abele gaire lu?

²⁹ E daratagerare, Nole; mena uaba darubum okakis abele saido, ese uaba paret adem abele ditania.

³⁰ Dikaer, no ikedi, mena omeida neis lu bakedida abele nur ge a ismi; ese nur tabarki, kaka uiabi detaut, uader le ismi, Uaba kekiam etami abele ditania, pako uaba ko didbari gaire lager, a urim disirik; ege abele saido, ua etami a azirik kari saido meta ge.

³¹ E uiabim etomeret nerute mer babisdarie, kega, Kotor baselaia mokakalam abele sinapi ra kep, a nerute le ais, a emor tabara ged ge:

³² Kebi kale abele kep tumem gaire kep uridili; ese emetu omeida, E aule tumem gaire nur lu, mena keubu au kale, a gaire ebur giz epereda tabakeuare uteid abi tam ge.

³³ E uiabim daratagerare nerute mer babisdarie, kega, Kotor baselaia mokakalam abele lu ise, nerute kosker ais ikedilu muige abele falaua neis netat mitkar, a keubu dabueri uridili.

³⁴ Ege Iesu de detaut abele gaire lu uridili mer babisdarie gaire le lakub; E uiabim detaut no mer babisdarie:

³⁵ Ueakai bakedid abele perofeta ra mer, kega, Kaka detaut no mer babisdarie, kaka uabi etomeret gaire gumik lu gizlam abele ditimedlu geseb ge.

³⁶ Ege Iesu dikaer abele le lakub, a balu abele meta ge; ege abara kaimeg giz tabakeuare abim, kega, Ma keribi etomeret tonar abele mer babisdarie abele ditania abele ged ge.

³⁷ Ege E etkalu uiabim, kega, Abele le debe saido dikri, abele Le la Uerem;

³⁸ Ege abele ged abele geseb ge peike; abele debe saido, abele baselaia ra le; a abele ditania, adud le giz ra omasker;

³⁹ Abele le kari kurab ge E dikri abele gaire lu, abele diabolo pedali; abele mur ge, abele geseb ge ra mop; abele ismi le, uiaba gaire angela giz.

⁴⁰ Peike mokakalam ditania etami a urim disirik abele ur ge; mokakalam ikeli abkoreb abele geseb ge ra mop.

⁴¹ Le la Uerem namarkare abara angela uiaba taraisare muige abara baselaialam uiaba le asareda, pako uader le adud tonar;

⁴² A uiabi batauered muige abele urueri amei; nagri ebazuer, pako tereg ikupamaretlare.

⁴³ Ege uiaba barkak tonar au zorom, mokakalam lem, abele uiaba Aba ra baselaia ge. Abele le grip nagri ko asoli, debele E asoli.

⁴⁴ Kotor baselaia mokakalam abele idolu ispi abele ged ge, a nerute le erdali, epe E ko ispi, a bakeam sererege, a terapei abara lu giz uridili, a abi bodomalam abele ged ge.

⁴⁵ Kotor baselaia mokakalam luge asesered le, E mamoro deraimer debe penina gaire lu bodomalam:

⁴⁶ E erdali nerute debe penina au bodomalam, ege E bakeam terapei abara lu giz uridili, a abi bodomalam.

⁴⁷ Kotor baselaia mokakalam abele net dikri batauered abele gur ge, a nagri gaire tonar lar uridili:

⁴⁸ Ege mitkar, a uiaba eguatumur abele tauer ge, a bamer, iterar debe lar a aretare epei ge, epe adud lar giz no batauered.

⁴⁹ Mokakalam mop abele geseb ge; angela giz bakeuare nakesmurare adud le giz, pako barkak le giz,

⁵⁰ Ege uiaba batauered uiabim adud le giz abele urueri amei; nagri ebazuer pako tereg ikupamaretlare.

⁵¹ Ege Iesu uiabim daratagerare, kega, Nako uaba emetu asered abele gaire lu uridili? Uiaba abim detaut, Uao, Opole ae.

⁵² Ege E uiabim daratagerare, kega, Dasmerare, aotale le uridili emetu ereuerem abele kotor baselaia, uiaba mokakalam tarim le la boai,

E tais emeret lu pako kerkar lu tabara luga metalam.

⁵³ Ege Iesu bakedidlu gaire mer babisdarie, E bakeamulu adem abele uteblam.

⁵⁴ E bakeamulu a osmeda taba ged ge, E uiabi ereuerem uiaba sunago, a uiaba abi damared, a mer detagerare, kega, Abele la E nagelam abara pardale pako adigir?

⁵⁵ Nako nole tonar le abara uerem? nako nole nei Maria abara apu? abara kaimer giz Iakobo, a Iose, pako Simona, a Iuda?

⁵⁶ Nako nole meribi dog abara berbet uridili? a nagelam abele le nagri gaire lu uridili?

⁵⁷ Ege uiaba abim asered. Epe Iesu uiabim daratagerare, Nole nerute perofeta nole zorom kak, epe tepteb abara boai ge nole abi zorom kak.

⁵⁸ Epe Iesu nole gaire adigir ikeli abele uteb ge, abelelam uiaba nole oatur kak.

14

¹ Abele kerker Heroda opole asoli Iesu ra tonar,

² E uiabim detaut tabara memeg le, Ioane Bapataiso pedali, ko eded akaida eudelam, abelelam gaire adigir E ikeli.

³ Abelelam Heroda emetu erpei Ioane, a ko abi didbare, a abi aziriklu abele au dubare meta ge, epe Herodialam, Filipo ra kosker abi narbetelam.

⁴ Abelelam Ioane abi detaut, kega, Nole abkobreb ma abi ispi, a ko ekai mara kosker.

⁵ E lagelag abi ipiti eumid, epe E geum gaire le lakub, uiaba dikiaporare E perofeta pedali.

⁶ Ege abele gerger itutarare Heroda esemelu, Herodia ra neur ginar diger uiabi opem, E abi sererege Herodaim.

⁷ Abele lu E aukase abim detager, a mer nakesmulu, ko abim ikuar nerute lu E abi damos.

⁸ E, abara apu abi namarida, a abi detaut, kega, Ma kari ikuar ike, abele Ioane Bapataiso ra kerem abele tanelu ge.

⁹ Ege opole au asiassi, epe abele mer nakesmululam, pako gaire le eidi leuer eroare abi kemem, E mer tigri a abi ikuar.

¹⁰ E abi namarid nerute le ismi Ioane ra kerem abele au dubare meta ge.

¹¹ Ege tais abara kerem abele tanelu ge, a abi ikuar abele neur; abele neur ko abi ikuar abara apu.

¹² Ege abara kaimeg giz abim tabakeurare, a ais abara gem a etkobei; a uiaba bakeuare Iesum, a abi etomertare.

¹³ Iesu abele asoli, E bakeamulu adem abele uteblam abele nar ge, E tepteb emeri abele lekak uteb ge: ege le lakub aserare, a uiaba abi irmilare tabakeuare tauer gab ge, gaire uteblam.

¹⁴ Ege Iesu bakeamulu, a uiaba nardarare abele gaire le lakub, abara nase baruk uiabim, E idigir uiaba gim le giz.

¹⁵ Bakedilu abele kikem, ege abara kaimeg giz abim tabakeuare, kega, Abele uteb le kak iridi, a niai niai abele gerger; ma uiabi namarkare abele le lakub, iaueakai uiaba bakeuare gaire uteb, leuer terapei a uiaba erolare.

¹⁶ Epe Iesu uiabim detaut, Nole abkoreb uiaba bakeuare; ua naisuerare, leuer, a uiaba erolare.

17 Ege uiaba abim detautare, Meriba nole leuer kak ike, epe no areto faif, a neis lar.

18 E uiabim detaut, kega, Karim tais ike.

19 E uiabim detaut abele gaire le lakub, Uaba eidi abele soge ge; E tais faif areto, pako neis lar, a edimrualu abele kotor, a esoao, a ko areto itur, a naisuerare tabara kaimeg giz, a abara kaimeg giz naisuerare abele le lakub.

20 Ege uiaba eroare, a kem osomeda ui uridili, a ui aratare kaier, tuelf gaire epei mitkar.

21 Uiaba eroare, nako faif thausan no kimiar, a kosker pako kebile giz nole atager kak.

22 Epe Iesu de dudum namarkare tabara kaimeg giz a atiem abele nar ge, kekiam bakeuare nerute apekem; E mena namarkare abele le lakub bakeuare.

23 E namarkare abele le lakub bakeuare, epe E tepteb ogi bakeamulu abele paser, a esorerapare. Bakedilu abele kikem, E tepteb abele uteb ge emrilu.

24 Abele nar muige abele karem ge, au zauber a nar agiri; abelelam uag opem uami.

25 Ege Iesu bakeamulu uiabi erdali, abele neis a neis abele ki ge le asesered, E ekasereder abele zauber tum ge.

26 Ege abara kaimeg giz ui abi erdalare, E ekasereder tumem abele zauber ge, ege uiaba okasosok, a uiaba dikiaporare, kega, Lamar pedali, ege uiaba au geum, a ko au sasemi.

27 Ege Iesu de sobkak uiabi daratagerare, kega, Uaba nerkep au saserim, kakanali, nole geum kak.

²⁸ Epe Peteru abim detaut, kega, Opole ae, ese mamanani, ma kari natager kaka bakeam marim tumem abele gur ge.

²⁹ Ege E abi detager, Ma tabakeam. Ege Peteru eupumalu abele narlam a ekasereder tumem abele gur ge, E bakeamulu Iesuim.

³⁰ E dasmer abele au uag, a E geum ge, epe ditimedlu a badimedlu, a ereretikri, kega, Abele Opole ae, ma kari uerkaben.

³¹ Ege Iesu de tag itrimuriklu, a abi erpeilu, a abim kega, Mama le kebikebi oituli, nalugelam mama asared?

³² A uiaba neis le atiem abele nar ge, epe metalug, a nole uag kak.

³³ Ege uader le muige abele nar tabakeuare abim esorgiru, a mer kega, Ageukar mamanani Ade ra Uerem.

³⁴ Uiaba akarida abele nerut apek, a bakedilu abele ged Genesareta.

³⁵ Gaire ged kemle uiaba abi erdali, a merkem namarkare abele pekem uridili, a uiaba taraisare abim gaire gim le giz uridili.

³⁶ Uiaba abi daramasare no kebikebi ituti uba ge abara am uali; a idigir uiaba gim uridili no kebikebi abi ituti.

15

¹ Ege aotale le pako Faresaio giz uiaba tabakeuare Iesuim Ierusalem, kega,

² Nalugem mara kaimeg giz datupida aule giz uiaba mer? abelelam uiaba leuer eroli a tag nole ogarup kak.

³ E etkalu uiabim, kega, Nalugem ua ko datupida Ade ra gelar gaire aule ra mer?

⁴ Abelelam Ade detaut, kega, Ma mamoro asoli mabi abera a apuera; a, Nerute abele le adud mer abele baba pako abele apu, a ko ipit eumilu.

⁵ Epe uaba detagerare, kega, Ese le detaut abele aba pako abele apu, Ese nerute lu kari dog abkoreb marim, abele emetu Adim ikuar peike;

⁶ A nole ko asoli taba abera a apuera. Uaba dedkoli Ade ra gelar mokakalam, uaba emereta merlam.

⁷ Uaba bes le giz, abkoreb uabim abele Isaia ra mer epili, kega,

⁸ Abele ged uiaba karim maiem uiaba telam, pako kari naospered uiaba mitelam; ege uiaba nerkep muriz ge karielam.

⁹ Uiaba no kari esorerapare, uiaba ikerare abele mizmiz le ra gelar.

¹⁰ Ege E dabgerare abele gaire le lakub, E uiabim detaut, Ua aserare a mamor asoli:

¹¹ Abele lu ikedilu le ra te nole le dedkoli; epe abele lu osmeda telam le dedkoli.

¹² Ege abara kaimeg giz abim tabakeuare, a abim kega, Nako ma umele gaire Faresaio giz mari ueku, uiaba asarare abele mer?

¹³ E etkalu, kega, Gaire lu uridili kara Aba penoka dali kotor ge nole amorda kak, E eiu adem.

¹⁴ No dikaer uiabim: uiaba sadamer le ko datkimoardare sadamer le. Ese abele sadamer le datkimoardare nerute sadamer le, epe uiaba neis le ekesmiri abele au uak.

¹⁵ Ege Peteru abim detaut, kega, Ma keribi etomeret abele mer babisdarie.

16 Ege Iesu detager, Nako uaba mena nole asor kak?

17 Nako uaba mena umer kak, gaire lu uridili ikedi abele te a ko irmi abele kem ge, ege imuda abele sumez ge?

18 Ege gaire lu tabakeuare a osmeda abele telam, epe giz nerkeplam; abele lu le dedkoli.

19 Abelelam nerkeplam tabakeam abele adud dikiapor, a le ipit eumilu, a kogem, a eruam, a bes mer, pako adud mer:

20 Gaire lu peike le dedkoli; ege abele le leuer eroli a tag nole aruba kak, umer kak le dedkoli.

21 Ege Iesu bakeamulu adem abele utebelam, E osmeda abele ged Turo a Sidona.

22 Dasmer, ababe Kanana kosker E tabarki abele peklam, a ereretikri abim, kega, Abele Opole ae, Dauida ra Uerem, ma kari omare, kara neur au adud abele demoni nagri.

23 Epe E nole mer kak abim. Ege abara kaimeg giz abim tabakeuare abi damsare, kega, Ma abi namarid ege bakeamulu, abelelam E mena meribi irmili a ereretikri.

24 E etkalu, kega, Ade nole kari namarida uader le, no mamoe Isaraela ra boai badimirida.

25 Ege E tabakeam abim a etkobeilu, kega, Abele Opole ae, ma kari upinati.

26 Ege E etkalu, kega, Nole abkoreb omasker ra leuer ko ais batauered omai giz.

27 E abi detager, Abele Opole ae, ageakar marim: epe nerute omai giz eroare puipi leuer abi laulau ge uiaba tebude.

28 Ege Iesu abim detager, kega, Kosker ae, mara oituli aule: mara lag mokakalam a ko ikeli

abkoreb marim. Epe abara neur ko akaida abele haua ge.

²⁹ Iesu bakeamulu adem abele utebelam, E osmeda maike abele Galilaia keper ge; E ogi abele paserem, a emrilu seb ge.

³⁰ Ege abim tabakeuare gaire le lakub, uiaba nagri uader le ibibi, a uader le sadamer, a uader le te dabimdabim, a uader le gebgeb, pako uader le gaire tonar gim, uiaba abi ituti Iesu ra teter ge; E uiabi nadgerare:

³¹ Ege gaire le lakub abi damreda, abelelam uiaba abi erdarare uader le te dabimdabim a mer detaut, a uader le gebgeb ko kemerkemer, a uader le ibibi ko nakasir, a uader le sadamer ko darasmerare; ege uiaba abi despereda abele Isaraela Ade.

³² Ege Iesu darabgerare abara kaimeg giz, kega, Kaka niabi nasenase abele le lakub, abelelam thri gerger peirdi uiaba emri kari dog, a nole leuer kak. Kaka umer kak uiabi namarkare ko bakeuare, a nole leuer aro kak, mena uiaba uererege abele gab ge.

³³ Ege abara kaimeg giz abi detagerare, Meriba nagelam gaire areto nagri abele sumez ge, iaueakai dordor le ra kem osmeda?

³⁴ Iesu uiaba daratgerare, kega, Nako naket areto uabi dog? Ege uiabi detager, Sefen; a uader kebi lar.

³⁵ E uiabi daratagerare abele gaire le lakub, Uaba baidi abele seb ge.

³⁶ E etaruk sefen areto a uader lar, a esoao, a itur, epe abi naisuerare abara kaimeg giz, a abara kaimeg giz ko naisuerare dordor le lakub.

³⁷ Ege uiaba uridili eroare, a kem osmeda; a uiaba etaker abele leuer kaier, a mitkar sefen gaire epei.

³⁸ Uiaba le eroarem foa thausan no kimiar, a kosker pako kebile giz nole atager kak.

³⁹ E uiabi namarkare abele le lakub bakeuare, E bakeamulu, a atiem abele nar ge. E bakeamulu abele ged Magadalen.

16

¹ Ege Faresaio giz pako Sadukaio giz abim tabakeuare, a uiaba abi mirem, kega, Ma keribi detomertare nerute atamelam kotorlam.

² E etkalu uiabim, kega, Mena kikem a uaba mer, kega, Debe lem barki: abelelam kotor ge au mam mam.

³ Abele kebi gereger a uaba mer ko, kega, Peirdi au irmir abele gereger: abelelam au mam mam dali, pako au kuba abele kotor ge. Uaba bes le giz, uaba umele etage kotor ra tonar, nako uaba nole umer kak urut atamelam?

⁴ Abele nosik le adud, pako kogem le giz, uaba karim deraimerare nerute atamelam; umer kak nerute atamelam uabi nakuarare, a tepteb Iona perofeta ra atamelam. E dikaerlu uiabim, a adem bakeamulu.

⁵ Ege abara kaimeg giz tabarki abele nerute apek, a uiaba okataprik ko areto ais.

⁶ Iesu uiabim detager, Uaba au derarati adem abele Faresaio giz ra leuen, pako Sadukaio giz ra leuen.

⁷ Ege uiaba mer atager, kega, Abara merlam, abelelam meriba nole areto tais.

⁸ Epe Iesu opasereret, E uiabim detager, Nalu uaba mer atager, uaba kebikebi oituli, abelelam uaba nole areto tais?

⁹ Nako uaba mena asor kak, a uaba nole dikiapor faife areto, pako faife thausan le, naket epei arota?

¹⁰ A ko sefen areto, pako foa thausan le, naket epei arota?

¹¹ Nako uaba mena nole asor kak, nole abele areto kaka uabi detager? Epe ua au derarati adem abele Faresiao giz ra leuen, pako Sadukaio giz.

¹² Ege uiaba umele, nole areto ra leuen E uiabi detager au derarti adem, epe Faresaio giz ra giz mer, pako Sadukaio giz.

¹³ Iesu bakeamulu abele Kaisaria Filipino ra nener, E itimerare abara kaimeg giz, kega, Nalu gaire le la mer, karim nete?

¹⁴ Uiaba abi detagerare, Uader le la mer, mama Ioane Bapataiso; a uader le, mama Elia; a uader le, Ieremia, pako nerute perofeta.

¹⁵ E uiabim detager, Nako uaba, nalu uaba mer, karim nete?

¹⁶ Ege Simona Peteru abi detaut, kega, Mama Keriso, Ade ra Uerem eded.

¹⁷ Ege Iesu etkalu abim, kega, Mama uerkab Simona Ba-Jona: abelelam nole le mari etomeret, epe kara Aba dali kotor ge.

¹⁸ Kaka mari detager, Mamanali Peteru, ka ko emoare kara ekalesia tumem abele neide ge; umer kak ur aseamur kak ra te abi tum ge

¹⁹ Kaka keubu mari nakuar kotor baselaia ra ki; ese nerute lu ma didibari abele geseb ge, a ko

didibari abele kotor ge; ese nerute lu ma detue abele geseb ge, a ko detue abele kotor ge.

²⁰ E uiabi daraisumdarare abara kaimeg giz nole ko atomeret kak nerute le E Iesu Keriso dali.

²¹ Abele kerker Iesu ditimedlu ko natomertare abara kaimeg giz abkoreb E Ierusalemam bakeamulu, ko gaire lu aiasi ikeli abim gaire aule giz pako zogozogo le giz pako aotale giz, uiaba abim ipitare eumida, E ko eded akaida thri gerger.

²² Ege Peteru abi datkimalu, a abi daisumdalul, kega, Opole ae, muriz ge marielam abele lu, umer kak bakedida marim abele lu.

²³ Ege E egeremalu Peteruim, a abim, kega, Satana ae, ma bakeam kara sor ge: ma mokakalam lu kari bamsili; abelelam ma nole lakak Ade ra lu, epe mamor le la lu.

²⁴ Iesu uiabi detager abara kaimeg giz, Ese le lagelag kari narmili, nole abkoreb ko irmili tabara lag, debele E ko ais tabara satauro, a kari narmili.

²⁵ Abelelam ese le omare tabara eded, E abi: epe abele le dedkoli tabara eded karielam, E ko nagri.

²⁶ Abelelam nalu lu abkoreb, ese abele le nagri geseb ge uridili, a ko dedkoli abara eded? a nalu lu ikuar abele le ko bodomalam abara eded?

²⁷ Abelelam Le la Uerem tabarki kemem pako abara angela taba Aba ra zorom ge; epe E bodomalam le giz abkoreb uiaba dorge.

²⁸ Ageakar kaka uabi detagereda, Uader le ike nole eud kak, mena dasmerare Le la Uerem ko tabarki abara baselaia ge.

17

¹ Eseamud sikes gerger, ege Iesu tegardare Peteru, a Iakobo, a Ioane abara keimer, a uiaba bakeuare abele pereper paserem, uiaba tepteb.

² E depegili uiaba opem, abara op au zoromzorom mokakalam lem ise, abara am uali au kakekake mokakalam datki ise.

³ Ko dasmer, Mose a Elia natomelu uiabim, a uiaba mer atager abim.

⁴ Peteru abi detager Iesuim, kega, Opole ae, debele meriba emeri ike; ese ma lag, keriba ikeli ike nole niai meta thri; mara nerute, a Mose ra nerute, a Elia ra nerute ko.

⁵ Dasmer, abele zoromzorom baz uiaba natkamda: ko dasmer, abele kodo mer bazelam, kega, Kara Uerem nase ge pedali, kaka abim sererege; uaba mamor abi asoli.

⁶ Abara kaimeg giz aserare, ege uiaba etkobei, a uiaba au geum.

⁷ Ege Iesu uiabi bakeamulu, E uiabi itut, a uiabi kega, Uaba tekue, uaba nole geum kak.

⁸ Uiaba pate uiaba pone, a nole nerute le erdali, epe Iesu tepteb.

⁹ Uiaba tabatueli abele paserlam, ege Iesu daraisumdarare uiabim, kega, Uaba nole atomeret kak nerute le abele lu uaba dasmerare, mena Le la Uerem ko eded akaida eudlam.

¹⁰ Abara kaimeg giz abi itimerare, kega, Nalu aotale giz uiaba mer, kekiam Elia tabarki?

¹¹ Ege Iesu etkalu uiabim, kega, Elia kekiam tabarki, a ko ditimed gaire lu uridili:

¹² A kaka uabi detager, Emetu Elia tabarki, a uiaba nole abi asmer kak, epe uiaba ikeli abim

gaire lu uridili uiaba lagelag. Mokakalam Le la Uerem, a ko uiaba abi dedkoli.

13 Ege abara kaimeg giz uiaba opasereret E uiabi detager abele tonar Ioane Bapatiso.

14 Uiaba baosi abele lekub ge, ege nerute le kei tabakeam abim, E kokomamu abim, kega,

15 Opole ae, ma abi omare kara uerem, E paim gim nagri au asiasi, abelelam gaire gerger ekesmiri abele ur ge, mokakalam gaire gerger abele ni ge.

16 Kaka ais abim mara kaimeg giz, a uiaba umer kak abi idigir.

17 Ege Iesu etkalu, kega, Abele nosik le nole oatur kak a barbar tonar, kaka uabi dog naket gerger? kaka uabi mena omare naket gerger? E karim tegaret.

18 Iesu abi daisumdalumu, ege adem esomelu adige abele demona abielam; epe abele uerem ko eded akaida, ditimedlu abele haua ge.

19 Iesu ra kaimeg giz abim tabakeuare, uiaba tepteb, kega, Nalugem keriba umer kak abi imuare?

20 Ege Iesu uiabi detager, Abelelam uaba nole oatur kak: ageakar kaka uabi detager, Ese uaba oituli abkoreb abele sinapi ra turum, a uaba detagerare abele paser, Ma bakeam abele uteb ge; E umele bakeam; nole nerute lu ko obogai uabim.

21 Epe tepteb abele esorerapare pako abele leuer baili umele adem bakeuare gaire lu mokakalam.

²² Uiaba nakasir Galilaia ge, ege Iesu uiabi daratagerare, Abele Le la Uerem namarid gaire le la tag:

²³ Uiaba ko abi ipit eumilu, a ko eded thri gerger. Ege uiaba au okasosok.

²⁴ Uiaba baosi Kaperanaumaem, gaire le tabakeuare Peteruim, uiaba tameleb giz erpei abele zeku lu, a abim, kega, Nako uaba ereuer le nole ikeli zeku lu?

²⁵ E uiabi detager, E ikeli. E balu abele meta ge, epe kekiam Iesu abi detager, kega, Simona ae, nako ma dikiapor? Netede tameleb erpei telo pako zeku lu gesep opole? Nako uiaba omasker nako nogle?

²⁶ Ege Peteru abim detager, Gaire nogle. Epe Iesu abi detager, Peike omasker no emeri.

²⁷ A nerute uiaba mena mudi mer meribim, ma bakea mabele gur ge, a ma batauered nerute uk, abele kekiam lar ma nagri ma tetaruka; a ko diske abara te, epe ma erdali abele setatara; ma ais uiabim ikuar mara a kara ko.

18

¹ Abele baua ge Iesu ra kaimeg giz abim tabakeuare, kega, Nete aule kotor baselaia ge?

² Ege Iesu dabgiri abele kebi uerem, a abi ekueilu uiaba opem,

³ A uiaba kega, Ageakar kaka uabi detager, Ese uaba nole depegeli a ko mokakalam kebile ise, umer kak uaba bao abele kotor baselaia ge.

⁴ Dasmer, ese le tababu gebgeb mokakalam abele kebi uerem ike, E aule kotor baselaia ge.

⁵ Ese nerute lo egaret abele kebile mokakalam kara nei ge, E kari nagaret.

⁶ Ese nerute le dedkoli nerute uiabim kebi kale kari oituli, debele abele le didibari etatimir au baker abara pereg, a gurim batimed au muimui karem ge.

⁷ Uaiiai abele gesep ge gaire lu dedkoli! abelelam mena tabarki gaire lu dedkoli; epe uaiiai abim le dedkoli tonar!

⁸ Ese mara tag mari nadkoli pako mara teter, debele ma isimi adem batauered; debele ma bao abele eded mara tag kebikebi nako ibibi, au adud mari batauered abele ur asam kak neis tag a neis teter.

⁹ Ese mara pone mari nadkoli, ma dekeamur adem batauered; debele ma bao abele eded a netat pone, au adud mari batauered abele ur genaim a neis pone.

¹⁰ Uaba nole dedkoli nerute uiaba ike kebi kale; abelelam kaka uabi detager, Uiaba angela dali kotor ge ner kak uiaba dasmered kara Aba ra op dali kotor ge.

¹¹ Abelelam Le la Uerem tabarki a uerkab abele le badimirid.

¹² Nako uaba dikiapor? ese le nagri handed mamoe, ese netat mamoe badimirid, nako nole dikaer passer ge nainete naine mamoe, a E bakeam deraimer abele netat mamoe badimirid?

¹³ Ese E erdali, ageakar kaka uabi detager, E aukase sererege abele, a kebikebi abele nainete naine nole adimir kak.

¹⁴ Mokakalam uaba Aba dali kotor ge, nole lakak nerute uiaba ike kebi kale ko abi.

15 Ese mara le mari nadkoli, ma bakeam a abi baraditug uaba neis le tepteb: ese E mari asoli, ma emetu erpei mabara le.

16 Ese nole mari asoli, ma bakeam tais nerute le nako neis le, iaueakai ageakarem neis le la mer, pako neis netat le.

17 Ese E nole asoli uiaba neis le, ma abi etomeret abele ekalesia: ese E nole asoli abele ekalesia, ma abi dikiapor mokakalam kupikupi le, pako telona le.

18 Ageakar kaka uabi daratagerare, Gaire lu uridili uaba didibare abele geseb ge, a ko didibare abele kotor ge: a gaire lu uridili ua ko detue abele geseb ge, a ko detue abele kotor ge.

19 Kaka uabi ko daratagerare, Ese uaba neis le abele geseb ge netate dikiapor nerute lu ko abi damsare kara Aba kotor ge, E ikeli abkoreb neis le la lag.

20 Abelelam abele uteb etami neis le pako neis netat le kara nei ge, kaka uiabi kemem.

21 Ege Peteru abim tabakeam, kega, Opole ae, naket kerker kara le kari nadkoli, a kaka mena abi omare? nako sefen kerker?

22 Ege Iesu abi detager, kega, Kaka nole mari detager, Sefen kerker; epe Sefente sefen.

23 Abele tonar kotor baselaia abkoreb nerute opole, E dikiapor deraimer tabara lu gaire abara memeg le giz.

24 E ditimed mer atager, E tegared nerute memeg le nagri abara talen ten thausan.

25 E umer kak erdali lu abi bodomalam abkoreb; abara opole uiabi detager, Ais bodomalam abele le, pako abara kosker, a gaire abara

omasker giz, pako abara lu uridili, iaueakai nagri lu kari bodomalam.

²⁶ Ege abele memeg le abim etkobeilu a es-orgilu, kega, Opole ae, ma mena kari omare, kaka keubu ko bodomalam mara lu uridili.

²⁷ Ege abele Opole au nasenase tabara memeg le, E no namarid abara mani nole bodom kak.

²⁸ Abele memeg le bakeam, E erdali nerute abara kaimeg memeg le E nagri abara handed denari; E abi erpei, a ko erpei abara pereg, a abim kega, Ma kari bodomalam kara lu mari dog.

²⁹ Ege abele kaimeg memeg le abim etkobei abara teter ge, a abi damos, kega, Ma kari omare, kaka keubu ko bodomalam mara lu uridili.

³⁰ Epe E umer kak, a ko bakeam abi taisili audubare meta ge, mena bodomalam gaire lu eseamud.

³¹ Uader abara kaimeg memeg le giz erdali gaire lu E ikeli, uiaba an uekueku, uiaba bakeuare, a natomertare uiaba opole gaire lu uridili E ikeli.

³² Abara opole abi dabgiri, a abim detager, kega, Abele adud memeg le ae, kaka mari omare, kaka no mari namarid nole bodom kak gaire kara lu mari dog:

³³ Nako ma nole omare kak mabara kaimeg memeg le, mokakalam kaka mari omare?

³⁴ Ege abara opole au uekueku, E abi namarid uader le abi dedkoed, mena eseamud bodomalam gaire lu uridili.

³⁵ Mokakalam kara Aba kotor ge E ikeli uabim abkoreb, ese uaba nole tababu omare uaba nerkep kemerkemer uaba le giz uabi dedkoeda.

19

¹ Ege Iesu eseamulu uader abara mer, ege E dikaelu Galilaia, a bosu Iudaia sep ge apek Ioridano.

² Gaire lekub abim irmilare; epe E uiaba nadgirare abele uteb ge.

³ Ege gaire Faresaio giz abim tabakeuare, a uiaba abi mirem, kega, Nako gelar nagri nerute le dituaki abara kosker a gaire luglam?

⁴ Ege E uiabi etkalu, kega, Nako uaba nole etage, abele le detagem le gizlam, E ikeli neis le kimiar pako kosker,

⁵ E uiabi detager, Abele lu kimiar dekaerti abara aba pako abara apu, a abara kosker ekpi; iaueakai neis le netat gem?

⁶ Peike nole ko neis le, epe neis le netat gem. Dasmer, uader le Ade daratkaprida, nole le atakeamur kak.

⁷ Ege uiaba abim daratagerare, Nalugem Mose de mer tigri ko ikuar abele jauali kosker abi dituaki?

⁸ Ege E uiabi detager, Ege uaba nerkepu au kelarkelar, abelelam Mose uabi ikuar ko dituaki uaba kosker; epe nole mokakalam gizlam.

⁹ Kakanali uabi detager, kega, Ese le dituaki tabara kosker a nole ko kak, a ko ispi nerute kosker, E kogem; ese le ispi abele amuam kosker, E dali kogem.

¹⁰ Ege abara kaimeg giz abim daratagerare, Ese tonar abkoreb kimiar a kosker, debele nole ispili kak.

¹¹ E uiabi detager, Umer kak gaire le uridili egaret abele mer, a uader le tepteb abkoreb ikuar.

¹² Abelelam uader eunuka umele kebi ueremlam, a uader eunuka uiaba tababu eunukaem abele kotor baselaialam. Ese le umele egaret, debele E egaret.

¹³ Ege egardare abim gaire kebile giz, iaueakai abara tag dikmerik uiaba tum ge, a esorerapare, ege abara kaimereg giz uiaba daraisumdarare.

¹⁴ Ege Iesu uiabi detager, Nole aisumdar kak, karim tabakeuare: abelelam uiaba ike abkoreb mokakalam kotor baselaia ge.

¹⁵ E uiabi dikmerik abara tag, ege E adem bakeam abele utebelam.

¹⁶ Dasmer, nerute le abim tabakeam, kega, Debe merkem ae, nalu debe lu kaka ikeli, iaueakai kaka nagri eded aseamur kak?

¹⁷ E abim etkalu, Nalu ma kari babeid kaka debele? nole nerute le debele, epe Ade tepteb: ese ma lagelag eded, ma mamor asesered gaire gelar giz.

¹⁸ E abim detaut, Nade? Ege Iesu abim etkalu, kega, Ma nole le ipiti eumilu, Ma nole eruam, Ma nole bes ageakarem,

¹⁹ Ma mamor omare mabi abera a apuera; Ma ko abi omare abele le emeri mai kes, mokakalam ma omare marim.

²⁰ Ege abele makeriam abim detaut, Ka umele asesered gaire lu uridili kebi ueremlam; a nalu lu kaier kaka nole ikeli?

²¹ Iesu abim detager, Ese ma lagelag debele kemerkem, mara tonar ma bakeam a ko terapei gaire mara lu, ma uiabi nakuarare gaire lu kak

le, iaueakai mara lu nagri kotor ge gaire debe lu giz, a ma tabakeam, kari narmili.

²² Ege abele makeriam asoli abele mer, E adem bakeam au okasosok; abelelam gaire abara lu.

²³ Iesu detager abara kaimeg giz, Ageakar kaka uabi detager, Au beber lu giz ra apu a bao kotor baselaia ge.

²⁴ Kaka uabi detager, Kamela umele bao abele nila neb ge, epe lu giz ra apu umer kak erdali Ade ra baselaia.

²⁵ Abara kaimeg giz aserare, a uiaba aukase damred, a uiaba mer, kega, Ese mokakalam, nete le umele eded?

²⁶ Iesu uiabi dasmer, a uiabi detager, Le giz umer kak abele lu; epe Ade umele gaire lu uridili.

²⁷ Ege Peteru de abim detaut, kega, Dasmer, keriba dikaer gaire lu uridili, a keriba mari narmili; nalu keriba lu nagri?

²⁸ Ege Iesu uiaba detager, Ageakar kaka uabi detager, Uaba kari narmili, ese Le la Uerem egimuru taba opole bao ge a zorum ge, abele ko ditimedlu, a uaba ko bagiri opole bao ge tuelf, a mer atager Isaraela ra nosik tuelf.

²⁹ Ese nerute le dikaer meta, pako keimer giz, a berbet giz, pako aba, a apu, pako kosker, a omasker giz, a ged giz, kara neilam, E nagri dordor gaire lu mokakalam netate handed, a ko nagri eded aseamur kak.

³⁰ A gaire le kekiam, a ko keubu; a uader le keubu, a ko kekiam.

20

¹ Abelelam kotor baselaia abkoreb nerute tarim le, kebi gerger E bakeam a mer atager uader le ikeli abara uina gedub, a ko uiabi bodomalam.

² E uiabi detager uader le dorge ikerare netate gerger a netate denari, E uiabi namarkare abara uina gedub.

³ Abele thri haua ge, E bakeam a ko erdali uader le bako abele zekur uteb, a nole dorge kak;

⁴ E uiabi detager, Ua ko bakeuare abele uina gedub, a kaka uabi daisuerare lu abkoreb. Ege uiaba ko bakeuare.

⁵ E ko bakeam abele sikis haua ge, pako nain haua, E ko ikeli mokakalam.

⁶ Abele ten haua, pako eleuen E ko bakeam, E ko erdali uader le bako a nole dorge kak; E uiabi detager, Nalugem uaba bako ike abele gerger kemerkemer, a nole dorge kak?

⁷ A uiaba abi detagerare, Nole le keribi detager. E uiabi detager, Ua ko bakeuare abele uina gedub, a uaba nagri lu abkoreb.

⁸ Ege kikem tabarki, abele tarim le abara uina gedub E detager abara sirdam memeg le, Dabgerare gaire gedub le, ma uiaba nakuarare uiaba bodomalam, ditimedilu keubu le ge, a bakedilu kekiam le ge.

⁹ Uiaba tabakeuare uader le ditimedilu abele ten haua, pako eleuen haua ge, uiaba nagri netate denari.

¹⁰ Ege kekiam le tabarkare, a uiaba dikiaporare uiaba lu aule nagri; a uiaba netate denari ko daragri.

11 Uiaba erdarare abele, uiaba mude mer daramear abele tarim le,

12 Kega, Netate abele haua ge uiaba keubu le dorge, a ma abkoreb uiaba lu keriba lu, keriba au asiasi abele dorgelam, pako abele gereger au urueri.

13 E detager abele nerute uiabelam a abi kega, Makanali, nole kara adud tonar marim; nako meriba nole mer atager abele netate denari?

14 Ma ekao mabara lu, ma bakeam; kara diki-apor peike kaka ko ikuar keubu le, mokakalam kaka mari ikuar.

15 Nako kaka nole karbabu sirdam karbara lu? Nako ma kari op ausiausi kara nase marim?

16 Mokakalam uader le kekiam a ko keubu, a uader keubu le a ko kekiam. Abelelam gaire le uridili aserare, a neis le mamor epei.

17 Iesu ogi bakeam Ierusalemaem, E ais abara kaimeg giz tuelf le, abele gab ge uiaba tepteb, E uiabi kega,

18 Dasmer, meriba ogi Ierusalemaem; a ko namarid Le la Uerem abele au zogozogo le giz pako aotale giz; uiaba abi dedkoare a ko eumilu,

19 Uiaba abi namarid uiabim gaire nogle, iaueakai uiaba abi neg degarare, pako damerik, a ko abi satauroem: E ko eded akaida thri gerger.

20 Ege abi tabaruk uiaba apu Zebedaio ra uerem okakis abara neis kimiar uerem, a abi etkobeilu, a damosdare nerute lu.

21 E abim detager, kega, Nalu lu ma laglag? E abim detaut, Ma uiabi daratager neis kara uerem emeri mari dog, nerute le mara tuter pek, a nerute le mar ber pek, mara baselaia ge.

²² Ege Iesu etkalu, a uiabi kega, Uaba umer kak abele lu ua kari namosi. Nako uaba umele ereli abele tanelu kaka are, a ko bapatiso abele kari bapatiso ge? A neis le abim kega, Keriba umele.

²³ E uiabi daratager, Uaba ereli kara tanelu, a ko bapataiso kara bapatiso; epe abele le emeri kara tuter pek, pako kara ber pek, nole kara dorge abi ikuar, a uader le kara Aba nakuarare abkoreb uiaba emetu derser.

²⁴ Uiaba ten le aserare, uiaba nerkep au uekueku abele neis le.

²⁵ Ege Iesu uiaba dabgerare, E uiabim kega, Ua umele gaire nogle uiaba tarim le nagri E uiabi asesered, a uader aule uiabi tumge E uiabi sirdam.

²⁶ Uaba nole mokakalam; ese le uaba lagelag aule, debele E uaba memeg le;

²⁷ Ese le uaba lagelag esaimer, E uaba sorge ekase;

²⁸ Mokakalam Le la Uerem nole tabarki memeg le taraisare, a E uiaba memeg le, a ko ikuar abara eded bodomalam gaire le giz.

²⁹ Uiaba osmed Ierikolam, gaire le lakub abi irmilare.

³⁰ Dasmer, neis le pone asadamer emrilei abele gab ge, a uiaba aserei Iesu tabakeam, uiaba ereretikri, kega, Opole ae, Dauida ra uerem, ma keribi omare.

³¹ Ege gaire le lakub uiabi daraisumdarare: epe neis le au ereretikri, kega, Opole ae, Dauida ra uerem, ma keribi omare.

³² Ege Iesu ekueilu, a darabgere neis le, E uiabi kega, Nalu lu uaba lagelag kaka uabim ikeli?

³³ A ui ge abi detagerei, Opole ae, keriba pone bakaerti.

³⁴ Ege Iesu au nasenase, a natutilu uiaba pone: ege sobkak ui ge pone bakaerti, a ui ge abi irmilei.

21

¹ Uiaba maike Ierusalem, a bosu Bethefage, abele Oliua paser, ege Iesu namariklu neis tabara kaimeg giz,

² A kega, Ua bakeamlam abele uteb uaba opem, ege uaba sobkak erdali abele asina didbarda, abara uerem okakis: a uaba uiaba detue, a karim tegared.

³ Ese nerute le uabi nerute mer detager, a uaba abi detager, Opole lagelag; E sobkak uabi ikuar.

⁴ Epe gaire lu uridili ikerare, iaueakai bakedilu abele perofeta ra mer, kega,

⁵ Uaba abi detagerare Siona ra neur uerem, Dasmer, mara Opole marim tabarki, E gebegeb tonar, E egimulu abele asina, a abara uerem ko.

⁶ Ege neis abara kaimeg giz bekeamulei, a ko ikeli mokakalam Iesu uiabim mer tigri;

⁷ Ui ge dagaretlei abele asina pako abara uerem, a uiaba am uali dikmerikare abi sor ge, a Iesu ko egimulu.

⁸ Abele gaire le lakub uiaba am uali esegarare abele gab ge, a uader le isemar lu tam, a esegarare abele gab ge.

⁹ Abele gaire le lakub uader le kekiam pako uader le irmili, a uiaba ereretikri, kega, Hosana abele Dauida ra Uerem: Mapodan le tabarki Opole ra nei, Hosana gaire lu tumge.

10 E bosi Ierusalema, abele uteb uridili boro, a mer kega, Nete le dali?

11 Ege le lakub uiaba kega, Abele Iesu ike, Nazareta perofeta, Galilaialam.

12 Iesu bao Ade ra zogo meta ge, E namuare uridili adige gaire le lu terarpeirare abele zogo meta ge, a erasigilu laulau uader le mani bodomalam, pako sik uader le dibadib bodomalam;

13 E uiabim detager, Emetu detali, Kara meta nei atker esorerapare meta; a uaba ikerare mokakalam baker kur ge eruam le giz.

14 Ege abim tabakeuare abele zogo meta ge, uader le pone asamam, pako uader le ibibi; E uiabi nadgirare.

15 Gaire au zogozogo le giz pako aotale giz a uiaba erdali abara adigir E ikeli, a kebile giz ereretikri abele zogo meta, kega, Hosana abele Daida ra Uerem; ege uiaba au uekueku,

16 Ege uiaba abim kega, Nako ma asoli uiaba mer? Ege Iesu uiabi etkalu, Uao; nako uaba nole atager kak, Ma derser uedakiriare gaire sursur uerem giz uiaba telam, pako nano uerem giz?

17 E uiabi dikaer, a bakeam abele uteblam Bethania tabarki, a emrilu.

18 Abele kebi gerger E iako takomeda abele utebim, E uererege.

19 E dasmer nerute suke abele gab ge, E tabarki, a erdali a nole lu kak abi dog, no lam tepteb; E abim kega, Ma nole ko omeid mara turum niai karem. Epe abele suke sobkak uatuet.

20 Abara kaimeg giz uiaba erdali a uiaba abi damerare, a mer kega, Nako abele suke ike keserkeser ekeamud?

21 A Iesu uiabi detager, kega, Ageakar kaka uabi detager, Ese uaba oituli, a nole asared kak, uaba ko ikerare nole abele lu suke tepteb, epe ese uaba detagerare abele paser, Ma agisi ma ko bataueret abele gur ge, E umele bakeam.

22 Gaire lu uridili uaba karim damosare abele esoreraparlam, a oaturlam nagri, uaba ko nagri.

23 E balu abele zogo meta, a ereuerem, E abim tabakeuare au zogozogo le giz pako aule giz abele ged ge, a uiaba mer, kega, Nalu abele sirdam ma ikeli gaire lu? Nete le marim ikuar abele sirdam?

24 Ege Iesu uiabim etkalu, kega, Kaka uabi itimer netat mer, ese uaba kari etomeret, a kaka ko uabi etomeret abele sirdam gaire lu kaka ikeli.

25 Nako Ioane ra bapataiso nagelam? nako kotorlam, nako lelam? Ege uiaba mer atager, kega, Ese meriba daratager, kega, Kotorlam; ege E meribim detager, Nalugelam uaba nole oatur kak abim?

26 Ese meriba abi detagerare, Lelam; meriba geum gaire le lakub; abelelam uiaba uridili dikiaporare Ioane E perofeta.

27 Ege uiaba Iesuim etkalu, kega, Keriba umer kak. E uiabim detager, Kaka umer kak uabi etomeret abele sirdam kaka ikeli gaire lu uridili.

28 Nako uaba dikiapor? Nerute le neis abara uerem; E bakeam abele narbet uerem, a abim kega, Makanali ma bakeam peirdi abele gerger kara uina gedub dorge ikeli.

²⁹ Ege E abim etkalu, kega, Kaka nole lakak; keubu ko obazgeda, E bakeam.

³⁰ E ko bakeam nerute uerem, a abara netat mer mokakalam, Ege E abim etkalu, kega, Opole ae, Kaka umele bakeam; epe no mer, a nole bakeam.

³¹ Nete le neis uerem ikeli taba aba ra lag? Ege uiaba abim kega, Narbet uerem. Ege Iesu uiabim etkalu, Ageakar kaka uabi detager, Kekiam telona giz pako gab kosker giz abele Ade ra baselaia ge bardare, a uaba keubu.

³² Abelelam Ioane kekiam uabim tabarki barkak tonar ra gab, ege uaba nole abi oatur kak; ege gaire telona giz pako gab kosker giz abi egardare; a uaba umele erdali, a uaba nole keubu obazged, ueakai abim oituli.

³³ Uaba aserare nerute mer babisdarie: Nerute tarim le, E ikeli tabara uina gedub, E kar dirumed, a daiui abele uteb uina detager, a ko ikeli au kar, E uiabim nakuarare gaire uina gedub le, E bakeam muriz gedim.

³⁴ Maike nur abi, E uiabim namarkare abara memeg le giz uiaba uina gedub le, ko taraisare gaire uina turum.

³⁵ Ege uiaba gaire uina gedub le erpeirare abara memeg le giz, uiaba damarka nerute, a ipit eumilu nerute, a nerute le uiaba baker erborare.

³⁶ E uader memeg le ko namarkare gaire le keubu, mokakalam a neis neis memeg le kekiam: a uiaba ko dedkolare uiabim.

³⁷ Epe keubu E namarid tabara uerem uiabim, E dikiapor, kega, Uiaba geum kara uerem.

³⁸ A gaire uina gedub le uiaba erdali abara uerem, ege uiaba mer atager, Abara kesem peike; tabakeuare meriba abi ipit eumilu, iaueakai meriba ais abara ged.

³⁹ Ege uiaba abi erpeirare a ko batauerd adige uina gedublam, epe uiaba abi ipitare eumilu.

⁴⁰ Dasmer, ese opole tabarki, E ged kem le, nalu lu ikeli uiabim gaire uina gedub le?

⁴¹ Ege uiaba abi detagerare, E aukase narsare gaire le adud tonar, E ko nakuarare abele uina gedub uader le ko dorge ikerare, a uiaba abi ikuarare turum gaire urut.

⁴² Iesu uiabi detager, Nako uaba nole etag abele jauali zogo, Abele baker gaire meta tonar le desauersili, a dikri, a mena ko ikeli kop tumge; abele lu Opole ikeli, meriba dasmerare, a abi damreda?

⁴³ Abelelam kaka uabi detager, Ade ra baselaia ais adem uabelam, a ko nakuar nerute ged, ueakai tais abara turum.

⁴⁴ Ese le abi tumgeabele baker abara lidi erpei: epe abele le baker abi tumge, E mogmog a diskimir.

⁴⁵ Au zogozogo le giz pako Faresaio giz aserare abara mer babisdarie, a uiaba opasereret uia-bielam Iesu detager.

⁴⁶ Ege uiaba lagelag abi erpeirare, a uiaba geum lekublam, abelelam uiaba dikiaporare E perofeta dali.

22

¹ Ege Iesu ko etomeret uader mer babisdarie uiabim, kega,

² Kotor baselaia abkoreb nerute opole, E derser leuer sererege tabara uerem,

³ E namarkare tabara memeg le uiabim gaire le emetu aserare abele mer tigri, Ua tabakeuare leuer aroem; a uiaba nole lakak tabakeuare.

⁴ E ko namarkare uader abara memeg le, a mer kega, Dasmer, kaka emetu derser gaire leuer; kara kau emetu ipitare, a gaire ebur debe kemkem narsare, kaka emetu derser gaire lu uridili, ua tabakeuare leuer aroem.

⁵ A uiaba baokarid, a uiaba keubu bamarkare, nerute le tabara ged, a nerute le tabara lu bodomalam;

⁶ A uader le uiaba erpeirare abara memeg le, a uiaba dedkolare, pako ipit eumilu.

⁷ Abele opole asoli E au urker, E uiabi namarkare gaire tabara ares le, uiaba narsare gaire le dedkolare abara memeg le, a ko digeare uiaba uteb.

⁸ E uiabim detager tabara memeg le, Emetu derser leuer, a nole abkoreb uiaba le emetu mer namarid.

⁹ Dasmer, uaba bakeuare gaire au gab, a gaire le uridili uaba erdali, uaba etomeret abele leuer.

¹⁰ Ege abara memeg le tabakeuare gaire au gab, a uiaba etami uader le, adud a uader le debele; abele leuer uteb mitkar lelam, uiaba eidi leuer eroare.

¹¹ Abele opole tabalu abele meta, E uiabi dasmer uiaba eidi leuer eroare, E erdali nerute le nole nagri am uali abkoreb leuer aro am uali;

¹² E abim detaut, Makanali ae, nalugelam ma tabakeam badare abele meta, ma nole nagri abele leuer aro am uali? Ege E nole mer kak.

13 Abele opole abi detager tabara memeg le, Uaba didbare abara teter pako abara tag, abi ais batauered adige abele kupikup ge; nagri au ebazuer pako abele tereg ikupamaretlare.

14 Abelelam uader le no aserare, a neis neis le mamor irmilare.

15 Ege Faresaio giz tabakeuare, a uiaba mer atager, Nalu lu meriba abi mirem abi merlam?

16 A uiaba namarkare abim uiaba kaimeneg giz kemem pako Herodiano giz, abi kega, Ereuer le ae, keriba umele ma le ageakar, mama ereuerem Ade ra gab pako ageakar, ma nole geum nerute le: abelelam ma nole dikiapore nerute le.

17 Dasmer, ma keribi etomeret, Nako ma dikiapor? Abkoreb ko ikuar Kaisaraim zegu lu, a nole?

18 Iesu opasereret uiaba nerkep adud, a uiabi kega, Uaba bes le giz, nalugelam uaba kari mirem?

19 Kari natomertare mani abele zegu lu. Ege uiaba abi ikuar nerute denari.

20 E uiabi detager, Nete ra op abele, pako abele jauali?

21 A uiaba abi detagerare, Kaisara ra op. Ege E uiabi detager, Dasmer, Kaisara ra lu Kaisaraim ikuar; Ade ra lu Adim ikuar.

22 Uiaba aserare, epe uiaba au kase damereda, a uiaba abi dikaer, a adem bakeuare.

23 Peike abele kerker Sadukaio giz abim tabakeuare, uiaba dikiaporare nole le ko eded akaid eudelam: uiaba abi itimerare,

24 Kega, Ereuer le ae, Mose keribi mer tigri, Ese eumilu nerute le, a nole uerem kak, abara

keimer ko ispi abara kosker, iaueakai nagri kusi abi keimerlam.

²⁵ Keribi dog emri sefen gaire uerem: a narbet uerem ispi abara kosker, E eumilu a nole uerem kak, abara keimer ko ispi abara kosker:

²⁶ Mokakalam nerute keimer, mena bakedida sefen le giz.

²⁷ Abele kosker keubu eumilu.

²⁸ Dasmer, ese keubu gerger tabarki, nete le uiabelam ais abele kosker? abelelam uiaba kosker uridili.

²⁹ Ege Iesu etkalu uiabim, kega, Uaba didmirik, abelelam uaba asmer kak abele jauali zogo, pako Ade ra adigir.

³⁰ Abelelam keubu gerger tabarki uiaba ko eded akaida eudlam, nole kosker aspili kak, a nole kimiar aspili kak, uiaba mokakalam Ade ra angela giz kotor ge.

³¹ Abele ko eded akaida eudlam, nako uaba nole atager kak Ade ra mer uabim, kega,

³² Kaka Aberahama ra Ade, a Isaaka ra Ade, a Iakobo ra Ade? Abele Ade nole eud le giz ra Ade, epe mamor eded le giz.

³³ Gaire lekub aserare, ege uiaba abi damreda abara giz merlam.

³⁴ Gaire Faresaio giz aserare Sadukaio le nole abi mer kak, ege uiaba etamiare abele uteb ge.

³⁵ Ege nerute uiaba gelar ereuer le, abi itimer miremer kega,

³⁶ Ereuer le ae, na gelar aule?

³⁷ Ege Iesu abi etkalu, Ma abi omare abele Opole mara Ade mara nerkep kemerkemer, a

mara lamar kemerkemer, a mara akiapor kemerkemer.

³⁸ Abele gelar kekiam, pako aule.

³⁹ Mokakalam abara neisem, Ma abi omare abele le emri mai kesi, mokakalam ma omare mabu.

⁴⁰ Peike neis gelar giz abele gelar uridili, pako abele gaire perofeta giz.

⁴¹ Faresaio giz netate gedim, ege Iesu de uiabi nautumerare,

⁴² Kega, Nako uaba dikiaporare abele Keriso? nete ra uerem? Ege uiabi abi detagerare, Dauida ra Uerem.

⁴³ E uiabi detager, Dasmer, Nako Dauida nei atker Lamarlam, E abara Opole, kega,

⁴⁴ Abele Opele abi detager kara Opole, Ma emri kara tuter tag, mena kaka ikeli uader le marim kurabkurab mokakalam lu detager mara teter?

⁴⁵ Dasmer, ese Dauida E nei atker Opole, a nalugelam E ko nei atker abara uerem?

⁴⁶ Ege nole nerute le umele abim etkalu, a ditimedlu abele gerger nole nerute le ko saserim itimer abim nerute lu.

23

¹ Ege Iesu detager gaire le lakub, pako abara kaimeg giz,

² Kega, Aotale giz pako Faresaio giz bakiri Mose ra bas.

³ Peike uaba mamor asarare a uaba ikerare lu uridili uiaba daratagerare, mamor asarare: epe uaba nole ereuerem uiaba tonar giz; abelelam uiaba no mer detaut, a umer kak ikerare abkoreb.

⁴ Abelelam uiaba didbare au lu beber uiaba dikemerik le giz uiaba tabo ge; ege uiaba umer kak uiaba kebi kei etadmir.

⁵ Gaire uiaba dorge uridili ikerare, iaueakai le giz uiabi darasmerare: uiaba ikerare au filakteri, pako ko au sisero uiaba am uali,

⁶ Uiaba au sererege eidi abele aule ra uteb leuer ero, pako aule ra bao sunago ge,

⁷ Pako gaire le uiabi nasege segur uteb ge, a gaire le giz uiaba nei natkerauem, Rabi ae, Rabi ae.

⁸ Ege uaba nole nei atker Rabi; abelelam netate uaba Ereuer le, abele Keriso idali, a uaba uridili keimer giz.

⁹ Uaba nole nerute le geseb ge nei atker uaba aba; abelelam netate uaba Baba, penoka dali kotor ge.

¹⁰ Uaba nole nei atker ereuer le, abelelam netate uaba Ereuer le, Keriso idali.

¹¹ Epe abele le aule uabim, E uabim memeg le.

¹² Ese nerute le tababu babei E aule, E ekekeli; Ese nerute le E tababu gebgeb, E bataili uiabim tumge uridili.

¹³ Uaiiai uaba aotale pako Faresaio, bes le giz! abelelam uaba dimi abele kotor baselaia lelam; abelelam uaba umer kak barot, a uaba ko daraisumdarare uader le barota.

¹⁴ Uaiiai uaba aotale pako Faresaio, bes le giz! abelelam uaba ais eseamulu mai kosker uiaba meta, a uaba esorerapare au pereper ikerare ispilu; abele lulam Ade ra urker aule uabi tumge.

¹⁵ Uaiiai uaba aotale pako Faresaio, bes le giz! abelelam uaba deraueili gur ge pako sep ge iaueakai uaba nagri nerute le uaba esorerapare;

ese uaba erpei, a uaba ikerare Gena ra le E au adud uabelam.

¹⁶ Uaiiai uaba datkimuar sadamer le, a uaba mer, Ese le iskosi abele zogo meta nolea kar, epe le iskosi abele zogo meta ra golo, niaiem peike!

¹⁷ Le giz paim ae, pako sadamer; abelelam nade aule, nako abele golo, pako abele zogo meta zogoem abele golo?

¹⁸ A nerute, Ese le iskosi abele zegu lu bao, nolea kar; epe abele iskosi abele zegu lu abi tumge, niaiem peike.

¹⁹ Le giz paim ae, pako sadamer; abelelam nade lu aule, nako zegu lu, nako bao ge zogoem abele zegu lu?

²⁰ Dasmer, abele le iskosi abele bao zegu lu, E iskosi gaire lu uridili abi tumge.

²¹ Abele le iskosi abele zogo meta, E abi iskosi, pako le emeri muige abele zogo meta.

²² Abele le iskosi abele kotor ge, E iskosi Ade ra bao, pako le abi dog egimulu.

²³ Uaiiai uaba aotale pako Faresaio, bes le giz! uaba ikuar kebi lu abele mili pako abele aneto pako abele kumina, a gaire au lu uaba ispilu abele gelarlam, abele barkak tonar, pako abele omare, pako abele oituli: abkoreb ikelare lu ike, a nole dikaer lu peike.

²⁴ Uaba datkimuar sadamer le, uaba dirimid abele lag, a mamor irusere kemerkemer abele kamela.

²⁵ Uaiiai uaba aotale pako Faresaio, bes le giz! uaba dirup abele tanelu ge ra sor pako abele kumeti, epe muige mitkar lu itike pako abele adud tonar giz.

26 Mama le Faresaio sadamer, mama kekiam dirup muige abele tanelu ge pako abele kumeti, iaueakai ogo kak kemerkemer abele sor ge.

27 Uai ai uaba aotale pako Faresaio, bes le giz! abelelam uaba mokakalam ao giz, adige au kakekake, debele le dasmer, epe muige mitkar eud le la lid, pako gaire adud lu uridili.

28 Mokakalam uaba, adige mokakalam barkak tonar le ise gaire le ra opem, epe muige uaba au mitkar abele bes mer pako abele tonar barbar.

29 Uai ai uaba aotale pako Faresaio, bes le giz! abelelam uaba emoare gaire perofeta uiaba ao, a ko deiriem uiaba ao le barkak tonar giz,

30 A uaba mer kega, Ese keriba abi dog emri abele kerker keriba aba giz emeret, umer kak keriba okakis uiaba narsare perofeta giz.

31 Peike abele mer uabu etomeret uabim, uaba omasker gaire le giz narsare gaire perofeta giz.

32 A uaba ko mitkar abele tonar lu uaba aba giz lam.

33 Ege uaba tabo, tabo areg ra omasker giz, nako uaba derar abele urker Genaim?

34 Dasmer abele lu, kaka uabi namarida perofeta giz, pako pardali le giz, pako aotale le giz; uader le uaba narsare, pako satauroem; a uader le uaba damarika uaba sunago, pako deraimerare nerute uteb a nerute uteb;

35 Iaueakai bakedida uabi dog gaire le giz barkak tonar uiaba mam uabelam emetu epaitered abele geseb ge, ditimedelu Abela ra mam, le barkak tonar, a bakedilu Zakaria ra mam, abele Barakaio ra uerem, uaba ipiti eumid abele kesi zogo meta pako zegu lu bao ge.

³⁶ Ageakar kaka uabi detager, Gaire lu uridili tabarki tumem abele nosik.

³⁷ Ierusalem a, Ierusalem a, le ipitare gaire perofeta giz, pako baker erboro le giz emetu namarid marim! kaka au lagelag etami mara omasker giz, mokakalam faul akuadare abara omasker muige abara peo, epe uaba nole la kak!

³⁸ Dasmer, uaba meta dikaertare a ko pisoger nagri.

³⁹ Abelelam kaka uabi detager, Uaba umer kak kari dasmer, mena keubu uaba kari daratagerare, Uerkab le tabarki Opole ra nei.

24

¹ Ege Iesu osmelu adem abele zogo metalam, epe abara kaimeg giz abim tabakeuare, a abi etomeret uader gaire meta giz abele zogo meta ge.

² A Iesu uiabi detager, Nako uaba nole asmer kak gaire lu uridili? Ageakar kaka uabi detager, Nole nerute baker igi tumem nerute baker, iako uababuare ueseamulu.

³ E emri abele Oliua paser, ege abara kaimeg giz abim tabakeuare uiaba tepteb, a uiaba kega, Ma keribi detagerare, Na kerker tabarki abele gaire lu? a nalu atamelam ma tabarki, pako abele geseb ra mop?

⁴ Ege Iesu etkalu uiabim kega, Mamoro nole nerute le uabi didmirik.

⁵ Abelelam gaire le tabarki kara nei ge, kega, Kakanali abele Keriso; uiaba ko didmirik gaire le.

⁶ Uaba aserare abele barseda, pako ares ra mer; uaba nole okasosok, abelelam abkoreb

bakedida peike gaire lu uridili, a nole tabarki abele mop ge.

⁷ Abelelam nerute ged bakeuare barseda nerute ged, pako nerute baselaia a nerute baselaia, iaueakai memeig tabarki pako gim gim a demali nerute uteb a nerute uteb.

⁸ Peike gaire lu uridili abele ditimeda gaire lu asiasi.

⁹ Ege uiaba uabi namarkare abele asiasi, pako uiaba uabi deres eumida; a gaire ged uridili uabi derar kara neilam.

¹⁰ Abele kerker gaire le asareda, nerute le mirem nerute le, a uiaba ueku uek.

¹¹ A gaire perofeta bes tabarki, a uiaba didmirik gaire le.

¹² Gaire le la nerkep gebgeb, abelelam au kale omeid abele adud tonar.

¹³ Epe abele le niaiem tekue mena bakedida mop ge, E ko eded.

¹⁴ A ko etomeret debe baselaia ra mer gaire ged narid, ko ikeli ageakarem gaire ged narid; iaueakai bakedilu abele mop ge tabarki.

¹⁵ Ese uaba erdali abele derar lu a dedkolare, mokakalam Daniela perofeta detaut, E tekue abele zogo uteb (le etage mamor dikiapor:)

¹⁶ Uaba Iudaia le abele kerker, uaba derar gaire paser:

¹⁷ Abele le meta tunge nole ko tabu bao ais nerute lu tabara metalam:

¹⁸ Abele le sumez ge nole ko akomeda tabara am uali ais.

¹⁹ Uai ai gaire kosker kem kem pako kosker uerem uerem abele kerker!

20 Uaba esorerapare iaueakai uaba nole derar abele zeru urut, pako abele sabath ge:

21 Abelelam abele kerker bakedida au asi-asi, nole abkoreb ditimeda gaire lu detagem abele geseb ge bakedida, peirdi nole mokakalam keubu gerger.

22 Ese nole teupai abele kerker, umer kak nerute le eded: epe sobkak eseamud abele kerker uiabelam emetu depegemer dare.

23 Ese nerute le uabi detager abele kerker, Dasmer, Keriso ike, pako pedali; uaba nole abi asoli.

24 Abelelam gaire Keriso bes tabarki, pako perofeta bes, uiaba ikerare gaire au atamelam pako adigir; iaueakai didmirik uader le emetu depegemelu, ese umele.

25 Dasmer, kaka kekiam uabi detomerta.

26 Iaueakai ese uiaba uabi detager, Dasmer, E penoka sumez ge; uaba nole bakeuare abim: Dasmer, E muige uteb ge, uaba nole uiabi asoli.

27 Abelelam mokakalam perper bilba abele naiger pek, a ko datki abele ziai pekem; mokakalam Le la Uerem ko tabarki.

28 Abelelam abele uteb nagri eud le, gaire aeto abi dog.

29 Ese emetu eseamud abele asi-asi abele kerker, ege abele lem au kupikup nole be kak, abele meb nole meb gerib kak, a uer giz nabuda abele kotorlam, kotor ge demali gaire ares lu.

30 Ege erdali abele kotor ge abele atamelam Le la Uerem: a gaire nosik le abele geseb ge au ebazuer, a uiaba erdali Le la Uerem tabarki gaire

baz abele kotor ge, pako abele adigir a au zorom zorom.

³¹ E namarkare tabara angela giz pako abele maber au bumer, a uiaba taraisare foa uag peklam uader le emetu depegemelu, ditimeda kotor paikai a bakedilu nerute paikai.

³² Uaba dikiaporare abele mer babisdarie abele suke; Ese kerkar omeida abara girikupi tam, pako au lamalam; uaba umele urueri urut maike:

³³ Mokakalam uaba, ese uaba erdali gaire lu uridili, uaba umele E maike abele gab te ge.

³⁴ Ageakar kaka uabi detager, Nole eseamud abele nosik, mena bakedilu gaire lu uridili.

³⁵ Eseamulu abele kotor ge, pako abele geseb ge, epe kara mer giz nole aseamur kak.

³⁶ Ege abele kerker pako abele haua ge nole le asmer kak, a angela giz kotor ge nole umer kak, ege kara Aba tepteb.

³⁷ Mokakalam Noa ra kerker, abkoreb Le la Uerem ko tabarki.

³⁸ Abelelam mokakalam abele kerker mega ogiri nole tabarki, uiaba eroli a ereli, a uiaba kosker ispida pako namarid, bakedilu abele kerker Noa balu abele tabara nar ge,

³⁹ A uiaba umer kak abele mega ogiri tabarki, a uiaba uridili ais adem eseamulu; mokakalam Le la Uerem ko tabarki.

⁴⁰ Abele kerker neis le emri sumez ge; nerute le ais, a nerute le ikedi.

⁴¹ Neis kosker edatimiri abele uteb saito edatimiri; nerute kosker ais, a nerute kosker ikedi.

⁴² Peike, uaba nole ute kak, abelelam uaba umer kak na haua ge uaba Opole tabarki.

⁴³ Uaba dasmer abele lu, ese tarim le ra boai umele abele haua ge eruam le tabakeam abele ki ge, E umele asesered, E nole dikaer tabara meta ko daiui.

⁴⁴ Abele lu uaba mamor derser; abelelam abele haua ge uaba nole akiapor kak, Le la Uerem tabarki.

⁴⁵ Nete abele ageakar memeg le pako debe akiapor, abara opole E ikosi a sirdam gaire memeg le, E uiabi ikuar uiaba leuer gaire haua abkoreb?

⁴⁶ Uerkab abele memeg le, ese abara opole tabarki, a abi erdali mena ikeli abkoreb.

⁴⁷ Ageakar kaka uabi detager, E abi ikosi ko sirdam abara gaire lu uridili.

⁴⁸ Ese abele adud memeg le E tababu detager tabara nerkepu, Kara opole uapum tabakeam;

⁴⁹ E ipit tabara kaimeg memeg le, a ko eroare pako ereli okakise uader le turtur ereli;

⁵⁰ Abele memeg le ra opole tabarki abele gerger nole asesere kak, pako abele haua E nole asmer kak,

⁵¹ E au bodomalam ikuar abim, a ko abi ikuar abara uteb kemem gaire bes le giz; nagri au ebazuer pako tereg ikupamaretlare.

25

¹ Abele kerker kotor baselaia abkoreb ten gaire neur, uiaba ais uiaba lamepa, a uiaba bakeuare obapit abele le kerkar kosker ispid.

² A uiaba faif neur pardali nagri, a faif neur paim paim nagri.

³ Uader neur paim paim, no lamepa ais, a nole ide kak;

⁴ Epe uader neur pardali, uiaba tarpor ide ais kemem lamepa.

⁵ Ege au uapum tabarki abele le kerkar kosker ispili, epe uiaba uridili uteid uaepiti a ko uteid.

⁶ Eipu ki ge tabarki abele le ereretikri tabarki, Dasmer, abele le kerkar kosker ispili tabakeam, uaba bakeuare abi obapit.

⁷ Ege neur uridili bako, a derser uiaba lamepa.

⁸ Ege paim paim neur uiaba uiabi daratagerare pardali neur, Uaba keribi ikuar ide; abelelam keriba lamepa maike asameida.

⁹ Epe pardali neur uiabi etkalu, kega, Nole abkoreb keribim pako uabim; debele uaba bakeuare uader le lu terapei, ua ko bodomalam uiabim.

¹⁰ Uiaba bakeuare ko bodomalam, epe abele le kerkar kosker ispili tabakeam; uiaba le emetu derser uiaba barota kemem okakis abim abele leuer sererege; ege abele te dimilu.

¹¹ Keubu uader neur ko tabakeuare, a uiaba kega, Opole ae, Opole ae, ma diski abele te keribim.

¹² E uiabi etkalu, kega, Ageakar kaka uabi detager, kaka nole asmer kak uabim.

¹³ Peike, uaba nole ute kak, abelelam uaba umer kak abele gerger pako abele haua ge Le la Uerem tabarki.

¹⁴ Mokakalam nerute le muriz ge bakeam, E darabgerare tabara memeg le giz, E uabi ikuar abara gaire lu.

¹⁵ E ikuar nerute le faif talen, a nerute le neis, a nerute le netat, abkoreb abele gaire lu le umele; epe E bakeamulu.

16 Abele le faif talen E bakeam ko terapei, E ko nagri uader faif talen.

17 Mokakalam abele le nagri neis talen, E ko nagri uader neis talen.

18 Epe abele le nagri netat talen E bakeam a daiui abele seb, a ko ispilu abara opole ra mani.

19 Gaire ki ge eseamulu abele memeg le ra opole tabarki, a uiaba mer atager abi luglam.

20 Abele le nagri faif talen E tabakeam a ko tais uader faif talen, a abi kega, Opole ae, ma kari ikuar faif talen; dasmer, kaka ko nagri uader faif talen.

21 Abara opole abi detager, Au debele abele debe memeg le ae, pako ageakar; ma ageakar abele uader kebi lu, kaka mari ikosi ko sirdam gaire au lu; ma tabakeam balu abele mara opole ra sererege.

22 Abele le nagri neis talen E tabakeam a abi detager, kega, Opole ae, ma kari ikuar neis talen; dasmer, kaka nagri uader neis talen.

23 Ege abara opole abi detager, Au debele abele debe memeg le ae, pako ageakar; ma ageakar uader kebi lu, kaka mari ikosi ko sirdam gaire au lu; ma tabakeam balu abele mara opole ra sererege.

24 Abele le nagri netat talen E tabakeam a abi detager, kega, Opole ae, kaka erdali mama au peper tonar le, ma ismi abele uteb ma nolea saito tigri, ma ko etami lu abele uteb ma nole depegelu:

25 Epe kaka au geum, a kaka bakeam ko ispilu mara talen abele seb ge; dasmer, mara lu ike.

²⁶ Abara opole abi etkalu, kega, Adud memeg le ae, pako au gebgeb, ma umele kaka ismi abele uteb kaka nole saito tigri, a kaka ko etami lu abele uteb kaka nole depegelu:

²⁷ Peike abkoreb, ese ma ikuar kara mani uader le mani terapei, iaueakai kaka tabakeam ko nagri kara lu pako abara bodomalam.

²⁸ Dasmer, uaba tais abele talen abielam, a ko ikuar abele le nagri ten gaire talen.

²⁹ Abelelam, ese le nagri lu, a ko ikuar abim lu, iaueakai au gaire lu abi dog: epe ese le nolea lu kak, debele ais adem abielam abele lu E nagri.

³⁰ Uaba imud abele memeg le nole abkoreb, abele kupikupi adige, nagri au ebazuer pako tereg ikupamaretlare.

³¹ Ese Le la Uerem tabarki tabara zorom, pako zogo angela giz uridili kemem abi dog, epe E egimuru tabara bao zorom ge:

³² Etami abara opem gaire ged narida uridili; E nakesmulu uiabim, mokakalam le asesered mamoe, E nakesmulu nani, pako mamoe;

³³ Ege ikedi mamoe abara tuter tag, a nani abara ber tag.

³⁴ Abele Opole uiabi detager uader le abara tuter tag, Uaba tabakeuare uaba emetu kara Aba uabi ikuar debe mer, uaba uteb abele baselaia, emetu derser uabim a nole detagem abele geseb ge:

³⁵ Abelelam kaka uererge, a uaba kari ikuar leuer kaka eroli; a kaka niap, a uaba kari ikuar ni kaka aree; a kaka supe le, a uaba kari egared:

³⁶ Kaka nole nesur kak, a uaba kari ikuar am uali; a kaka gimgim, a uaba kari dasmer; kaka

emeri abele audubare meta, a uaba tabakeuare kari dasmer.

³⁷ Barkak tonar le giz uiaba etkalu, kega, Opole ae, na gerger keriba erdali ma uererege, a keriba mari asisiem? pako niap, a keriba mari ikuar ni ma ereri?

³⁸ Na gerger keriba mari erdali ma supe le, a keriba mari egared? pako nole nesur kak, a keriba mari ikuar am uali?

³⁹ Na gerger keriba mari erdali ma gim gim, pako ma emeri abele audubare meta ge, a keriba bakeuare mari dasmerare?

⁴⁰ Ege Opole uiabi etkalu, kega, Ageakar kaka uabi detager, Abelelam uaba ikerare nerute le kebi kale kara keimer ike, kakanali uaba ikerare.

⁴¹ E uiabi detager uader le abara ber tag, Uaba le adud tonar, bakeuare adem karielam, abele ur niai karem, emetu derser abkoreb abele diabolo pako tabara angela giz:

⁴² Abelelam kaka uererege, a uaba nole kari ikuar leuer; a kaka niap, a uaba nole kari ikuar ni kaka aree:

⁴³ Kaka sup le, a uaba nole kari egared; kaka nole nesur kak, a uaba nole kari ikuar am uali; kaka gim gim, kaka emeri abele audubare meta, uaba nole kari dasmer.

⁴⁴ Ege uiaba etkalu abim, kega, Opole ae, na gerger keriba mari erdali ma uererege, pako niap, pako supe le, pako nesur kak, pako gim gim, pako emeri abele audubare meta, a keriba nole mari memege le?

⁴⁵ E uiabim etkalu, kega, Ageakar kaka uabi daratagerare, Abelelam uaba nole ikerare nerute

le kebi kale uiaba ike, epe kakanali uaba nole ikerare.

⁴⁶ Ege uiaba bakeuare peike abele asias niai karem: epe barkak tonar le giz ko bakeuare abele eded niai karem.

26

¹ Iesu eseamulu abara mer uridili, E uiabi detager tabara kaimeg giz,

² Uaba umele, eseamud neis gereger abele paseka ikeli, a Le la Uerem namarid ko satauroem.

³ Abele kerker etami gaire zogozogo le giz, pako aotale giz, pako aule giz abgedlam abele zogo le ra meta ge, abara nei Kaiafa;

⁴ A uiaba mer atager nalu lu umele mirem erpei, pako ipitare eumilu Iesu.

⁵ A uiaba kega, Nole ikeli abele uetpur, iaueakai abele ged ataperetlam.

⁶ Iesu emri Bethania, Simona lepera ra meta,

⁷ Nerute kosker abim tabakeam nagri abele alabasa tarpor, muige abele ide debe lagelag au bodomalam, E epaitered abara kerem, a E eidi leuer aroem.

⁸ Abara kaimeg giz uiaba erdali, uiaba nerkepu au asiasi, a uiaba kega, Nalugelam abele lu dedkoli?

⁹ Abelelam, ese terapei abele ide debe lagelag, mena gaire lu bodomalam a ko nakuarare gaire lu kak le.

¹⁰ Iesu umele, E uiabi kega, Nalugem uaba bamsili abele kosker? abelelam E debe lu karim ikeli.

11 Abelelam uaba mena emri okakis gaire lu kak le, epe kakanali uabim nole niai emri.

12 Abelelam E epaitered abele ide debe lagelag kara gem kekiam, keubu kara etkobei.

13 Ageakar, kaka uabi detager, Gaire ged uridili abele geseb ge etomertare abele euangelia, a ko etomeret abele lu abele kosker ikele mena ko dikiapor abim.

14 Nerute le abele tuelf lelam, abara nei Iuda Isakariota, E bakeam gaire au zogozog le giz,

15 A uiabi kega, Nalu lu uaba kari ikuar, a kaka abi ikuar uabim? Ege uiaba abi ikuar mani thirti.

16 Abele gerger ge E ditimed mirem abim, na kaua umele ko abi erpei.

17 Abele kekiam gerger abele areto nole isi kak, abara kaimeg giz Iesuim tabakeuare, a abim kega, Nade uteb ma lagelag keriba derser ko paseka eroare?

18 Ege E uiabi detager, kega, Uaba bakeuare abele uteb, a nerute le uaba abi daratagerare, Abele Ereuer le mari detager, Kara mop maike; kaka ikeli abele paseka mara meta, kaka pako kara kaimeg giz.

19 Ege abara kaimeg giz ikerare mokakalam Iesu mer tigri, a ko derser abele paseka.

20 Kikem tabarki, E eidi leuer ero kemem tuelf le.

21 Uiaba eroare, E uiabi detager, Ageakar, kaka uabi detager, uabelam nerute le kari mirem.

22 A uiaba au asiiasi, a uiaba ditimeda abim detagerare, Opole ae, nako kaka?

²³ E uiabi etkalu, kega, Abele le kemem akameida abara tag, pako kara tag abele tanelu ge, E dali abele le kari mirem.

²⁴ Le la Uerem bakeamulu, mokakalam detarer abim; epe abele le Le la Uerem abi mirem uaiiai abele le! debele abele le nole aosmer kak.

²⁵ Ege Iuda, le abi mirem, abi etkalu, kega, Rabi ae, nako kaka? E abi detager, Eko mama detager.

²⁶ Uiaba eroare, Iesu ekao abele areto, a esoao, a itur; a uiabim nakuarare tabara kaimeg giz, kega, Tekao, aroem; kara gem ike.

²⁷ E tanelu ekao, a esoao, a uiabim nakuarare, kega, A ui uridili areem;

²⁸ Abelelam kara mam ike, abele mam kerkar gelar ko epaitered gaire le giz adem dikri le ra uite giz.

²⁹ Kaka uabi detager, kega, Kaka nole aree kak abele uina turumlam, mena bakedida abele gerger kaka ko aree abele kerkar uaina uabi kemem kara Aba ra baselaia.

³⁰ Uiaba emetu uedakiriare nerute ued, a uiaba Oliua paserem bakeamuda.

³¹ Ege Iesu uiabi detager, Uaba uridili ezig-mada karielam abele ki ge; emetu detali, kega, Kai le mamoe asesered ipiti, epe mamoe giz kepu bamarid.

³² Ese kaka ko eded akaida, kaka kekiam bakeam Galilaiaem, a uaba keubu.

³³ Epe Peteru abi detager, kega, Ese ui uridili marim ezigmada, kai nolea.

³⁴ Iesu abi detager, kega, Ageakar kaka mari detager, kega, Abele ki ge, kimiar faul nole ereretikri kak, a neis netat ma kari nasared.

³⁵ Peteru iako elele detager, kega, Ese kaka mari kemem naumilu, kaka nole mari asared kak. Uiaba uridili daratagered abkoreb.

³⁶ Uiaba baosi kemem Iesu abele ged nei Gethesemane, E uiabi detager, tabara kaimeg giz, Uaba bamer ike, a kaka bakeam peike ko esorerapare.

³⁷ E bakeuare kemem Peteru pako Zebedαιο ra neis uerem, E au asiassi a ko okasosok.

³⁸ E uiabi detager, Kara nerkepu au asiassi, bakedida abele eud; uaba ko bamer ike, pako kari kemem uti kak.

³⁹ E kebikebi bakeam, a E etkobeilu, a esorerapare, kega, Kara Aba ae, ese umele, adem abele tanelu karielam; epe nole kara lag ikeli, mabara lag ikeli.

⁴⁰ E ko akomed a erdali abara kaimeg giz uiaba uteid, E detager Peteruim, Nako, uaba nole saserim kari kemem uti kak abele netat haua ge?

⁴¹ Uaba uti kak a esorerapare, iaueakai uaba nole mirem barota; merkepu au lagelag, a gem gebegeb.

⁴² E iako bakeam, a esorerapare, kega, Kara Aba ae, ese nole umele adem abele tanelu karielam, mena kaka aree, mabara lag ikeli.

⁴³ E iako akomeda a uiaba erdali ko uteid, abelelam uiaba pone au perper.

⁴⁴ E uiabi dikaer, a ko bakeam esorerapare abele neis netat bakeam, E no netat mer detager.

⁴⁵ E iako akomeda a erdali abara kaimeg giz, E uiabi kega, Uaba uteid, a nerbazi: dasmer, maike abele haua Le la Uerem ko abi mirem gaire uit le giz ra tag.

46 Bako, meriba bakeuare: dasmer, E maike abele le kari mirem.

47 Dasmer, E mer detaut, Iuda tabarki, nerute le tuelf lelam, E kemem gaire le lakub, pako zogozogo le giz, a aule giz abgedlam, uiaba nagri teibur aososo tulik pako gabgab.

48 Abele le abi mirem E uiabi etomeret nerute atamelam, kega, Abele le kaka abi eskos, E dali: uaba abi erpeirare.

49 E sobkak tabarki Iesuim, a abi kega, Rabi ae; a abi eskos.

50 Iesu abi detager, kega, Makanali, nalugem ma tabakeam? A uiaba tabakeuare a tag giz Iesui dog emarirare, a ko erpeirare.

51 Dasmer, nerute le Iesui dog E ekao tabara teibur aososo tulik iseda, E ipiti nerute zogozogo le giz ra memeg le abara laip ismilu.

52 Iesu abim detager, Mara teibur aososo tulik ko ikedi taba gedge; abelelam uiaba uridili ekao abele teibur aososo tulik, a ko eumilu abele teibur aososo tuliklam.

53 Nako ma dikiapor kaka nole umele damosi kara Aba ko namarkare karim gaire angela giz tumem gaire legiona tuelf?

54 Nako nole bakedida gaire iauali zogo, abkoreb bakedida abele gaire lu?

55 Peirdi abele haua kige, Iesu detager gaire le lakub, Nako uaba karim tabakeuare, gaire teibur aososo tulik, pako gabgab ko erpei mokakalam idikeda le ise? Meriba bamer abele zogo meta, kaka uabi ereuerem gaire gerger, a uaba nole kari erpei.

⁵⁶ Gaire lu uridili ikerare, iaueakai bakedilu gaire perofeta giz uiaba iauali. Abara kaimeg giz abi dikaerti, a uiaba derar.

⁵⁷ Uiaba Iesu erpeirare, a abi datkimuardare Kaiafaim zogo le, a gaire aotale giz le pako aule giz netate gedim.

⁵⁸ Epe Peteru muriz ge abi irmili, zogo le ra meta tabarki, a balu a emri kemem gaire memeg le, E lagelag erdali abele mop.

⁵⁹ Ege gaire zogo le giz pako aule giz pako gaire tarim le uridili uiaba deraimerare uader le bes ageakarem Iesuim, iaueakai uiaba abi ipitare eumilu:

⁶⁰ Epe nole erdali; a ko tabakeuare gaire bes ageakarem, a nole ardar kak. Keubu neis le bes ageakarem tabakeamlei, a kega,

⁶¹ Abele le keribi detager, Kaka umele Ade ra zogo meta ezageri, kaka umele ko ikeli neis netate gerger.

⁶² Abele zogo le ekue, a abim kega, Nako ma nole mer etkalu? nako neis le ra mer marim?

⁶³ Epe Iesu nole mer kak. Ege zogo le abim detager, kega, Kaka mari detager, Ma iskosi keribim edede Ad ra nei, nako mama Keriso Ade ra Uerem?

⁶⁴ Ege Iesu abi detager, Eko, mama detager; kaka uabi detager, Keubu uaba erdali Le la Uerem E emri tuter tag abele adigir kemer le, E ko tabakeam gaire kotor baz giz ge.

⁶⁵ Abele zogo le tabara am uali etoat, a uiabi kega, E adud mer egali Adim: nako, nole ko abkoreb nerute ageakarem meribim? dasmer, uaba aserare peirdi abara adud mer egali Adim.

66 Nako uaba dikiaporare? Ege uiaba daratagerare, kega, Abkoreb E eumilu.

67 Ege uiaba mos iduari abara opem; a uader le tag giz ipitare abim,

68 A uiaba mer kega, Keriso ae, mase keribi etomertare, nete le mari ipiti?

69 Epe Peteru E adige emri abele meta ge; nerute memeg neur abim tabakeamulu kega, Mama nerute le kemem Iesu Galilaia le.

70 E abi asared uiaba opem uridili, kega, Kaka umer kak abele lu ma kari detager.

71 E teosomeda abele maisu ge, a nerute memeg neur ko abi erdali, E detager uader le, Abele le E kemem Iesu Nazareta le.

72 E ko abi asared, a ditimeda adud mer egali, kega, Kaka umer kak abele le.

73 Kebikebi, uader le tekueilu, a uiaba kega, Peteruim, Ageakar ma nerute le uiabelam; abelelam keriba umele mara kodomer.

74 E ko adud mer egali, a iskosi, kega, Kaka umer kak abele le. Ege kimiar faul sobkak ereretikri.

75 Epe Peteru ko dikiapor abele mer Iesu abi detager, Nole kimiar faul ereretikri kak, ma neis netat kari asared. Ege osomed E au ezoli.

27

¹ Gerger osakeida, gaire zogozogo le giz uridili, pako aule giz abgedlam uiaba mer atager Iesu ko abi ipit eumilu:

² Uiaba abi didbari, ege uiaba datkimoardare a abi ikuar Pontio Pilato abele opole.

³ Iuda umele, abele le abi mirem, E ko obazgeda, a ko ikuar thirti gaire mani gaire zogozogo le, pako aule giz,

⁴ Kega, Kaka au uit le, abelelam kaka mirem abele le nole uit kak. A uiaba abi kega, Nako keribim abele lu? epe ma mabu abele lu.

⁵ E batauered abele gaire mani abele zogo meta ge, E adem bakeam; E bakeam a tababu baudubari.

⁶ Gaire zogozogo le giz uiaba ekao abele gaire mani, a kega, Abele lu gelar, umer kak ikedilu abele mani uteb ge gaire zogo lu ikedi, abelelam mam bodomalam.

⁷ Uiaba mer atager, epe abi bodomalam le ikeli kakekak tanelu ra ged, a ko etkobeilu gaire sup le.

⁸ Abelelam nei atker abele ged, Mam ra ged, bakedida peirdi abele gerger.

⁹ Iaueakai bakedelu Ieremia perofeta ra mer, kega, Uiaba ekao abele thirti mani, abele le bodomalam, uader Isaraela ra omasker uiaba abi bodomalam;

¹⁰ A uiaba abi bodomalam le ikeli kakekak tanelu ra ged, mokakalam abele Opole uiabi detager.

¹¹ Iesu ekueilu opole ra opem; abele opole abi itmer, kega, Nako mama Iudaia le giz ra Opole? Iesu abi etkalu, Eko, mama detager.

¹² Gaire zogozogo le giz pako aule giz uiaba abi etomertare gaire abara mer, epe E nole mer kak.

¹³ Pilato abi detager, Nako ma asoli gaire lu uiaba mari etomertare?

¹⁴ Epe E nole abi etkalu netate mer; abelelam abele opole au damred.

15 Opole ra tonar namarid nerute uetpur abele gaire le lakubem nerute le didbari, uiaba lagelag.

16 Abele kerker uiaba nagri nerute le didbari, au adud le, abara nei Barabasa.

17 A uiaba netate uteb ge, Pilato uiabi detager, Nete le uaba lagelag kaka uabi namarid? Nako Barabasa? Nako Iesu, le nei atker Keriso?

18 Abelelam E umele uiaba kurablam abim ikuar.

19 E egemeru abele mer atager bao ge, abele merkem tabakeam tabara koskerlam, kega, Ma nole abi dedkoli abele le barkak tonar; abelelam kaka au asiasi kara peim abim abele gerger.

20 Gaire zogozogo le giz pako aule giz uiaba namarkare gaire le lakub uiaba abi daratagerare, Barabasa namarid, a Iesu ipit eumilu.

21 Abele opole uiabi detager, kega, Nete le neis le peike uaba lagelag kaka uabi namarid? Ege uiaba daratagerare, Barabasa.

22 Pilato uiabi etkalu, kega, Nalu lu kaka ikeli Iesuim, abele le nei atker Keriso? Ege uiaba uridili abi daratagerare, Abi satauroem.

23 Opole uiabi etkalu, Nalu adud E ikeli? A uiaba aukase ereretikri, kega, Abi satauroem.

24 Pilato umele uiaba nole asoli abara mer, a uiaba au sasemi, E ekao abele ni abara tag dirup gaire le lakub ra opem, a uiabi kega, Kaka ogog kak abele barkak tonar le ra mam: uabu abele.

25 Abele ged uridili abi daratagerare, kega, Keribi tumge, pako keriba omasker giz, abara mam.

26 E Barabasa namarid uiabelam, E abi damarik Iesu, a ko ikuar abi satauroem.

²⁷ Gaire ares le uiaba datkimoardare Iesu abele opole ra meta, a uiaba netate gedim abim gaire ares le uridili.

²⁸ Uiaba iki adem abara am uali, a uiaba abi ame abele mamam am uali.

²⁹ Uiaba euerare abele aper abele lu zegerzeger, a uiaba dikmerik abi kerem ge, a uiaba ikedirare abele kokeda abi tuter tag ge, a uiaba kokmamu abim, kega, Uaiiai abele Iudaia le giz ra Opole!

³⁰ Uiaba abi mosu iduare, a uiaba edarkare abele kokeda a ko ipitare abi kerem ge.

³¹ Uiaba emetu abi neg degarare, a uiaba detueare adem abele am uali, a ko abi ame tabara am uali, ege uiaba abi datkimoardare ko satauroem.

³² Uiaba bakeuare, a uiaba erdarare nerute Kurene le, abara nei Simona; a uiaba damsare abim ko ais abara satauro.

³³ Uiaba abele utebe tabarki nei atker Gologotha, tonar abele, Kerem lid ra uteb,

³⁴ Uiaba abi ikuar abele uinega ataperet okakis abele kurab lu E ereri; E kebikebi ere, a umer kak ere.

³⁵ Uiaba abi satauroem, ege uiaba terapei abara am uali, a luglug ikeli netede ekardare: iaueakai bakedilu abele perofeta ra mer, Uiaba terapeirare gaire kara am uali, a uiaba luglug ikeli kara gem uali.

³⁶ Uiaba bamer abele utebe abi asesered;

³⁷ Uiaba dikmerik tumem abi kerem ge abele jauali, abele lu abi emerered, ABELE IESU IUDAIA LE GIZ RA OPOLE.

³⁸ Uiaba abi satauroem kemem abi dog neis eruam le, nerute le tuter tag, a nerute le ber tag.

39 Gaire le nakasir, uiaba abi adud mer nakarare, a uiaba kerem abi dirilare,

40 Kega, Mama le zogo meta ezageri, a neis netat gerger ko ikeli, ma mabu eded. Ese mama Ad ra Uerem, ma mabu tarabu abele sataurolam.

41 Mokakalam zogozogo le giz, pako aotale giz, pako aule giz, uiaba abi neg degarare a kega,

42 E umele uader le idigir, a nole umer kak tababu idigir: Ese E dali Isaraela Opole debele E uatabu peirdi abele sataurolam, iaueakai keriba abi oituli.

43 E Adim oituli; debele peirdi E abi idigir, ese E abi omare: abelelam E detager, kaka Ade ra Uerem.

44 Mokakalam abele neis eruam le kemem abi dog satauroem, uiaba abi adud mer egali taba opem.

45 Ditimedlu abele sikes haua kupikupi ged ge uridili bakedilu abele nain haua ge.

46 Maike nain haua Iesu au ereretikri, kega, Eli, Eli, lama sabakethani? tonar abele, Kara Ad, kara Ad, nalugem ma kari nakaerti?

47 Uader le bako aserare, ege uiaba kega, E Elia dabgeri.

48 Nerute le uiabelam E koreder ekao abele sap, a akameilu abele uinega, a agisilu pater ge, a abi ikuar ere.

49 A uiaba uridili abi daratagerare, Dikaer; meriba dasmer, nako Elia umele tabarki ko abi idigir.

50 Iesu ko au ereretikri, epe namarid tabara lamar.

⁵¹ Dasmer, abele uali demed zogo meta muige tababu batoat kotorlam a giz ge; abele sep demali; a neide nakesmur;

⁵² Gaire ao emetu te diski; gaire zogo le ko eded akaida eudlam;

⁵³ Emetu abara ko eded akaida, uiaba bakeuare abele zogo uteb, gaire le uiaba dasmerare.

⁵⁴ Abele kerem le netate handed nosik le, pako uader le kemem Iesu abi asesered, uiaba erdarare abele sep demali, pako gaire lu ikerare, a uiaba au geum, kega, Ageakar Ade ra Uerem idali.

⁵⁵ Gaire kosker giz uiaba muriz ge abi dasmerare, uiaba Iesu abi irmilare Galilaialam, uiaba abi memeg:

⁵⁶ Uiabi kemem Maria Magadalena, pako Maria Iakobo a Iose uiaba apu, a Zebedaiora uerem uiaba apu.

⁵⁷ Abele kikem tabarki, nerute le lu giz ra apu Arimathia le, abara nei Iosefa, E nerute Iesu ra kaimeg giz:

⁵⁸ E bakeamulu Pilatoim abi damos abele Iesu ra gem. Pilato uiabi detager ko abi ikuar abele gem.

⁵⁹ Iosefa ais abele gem, a sopem erebe abele uali lino og kak,

⁶⁰ A ikedilu tabara ao ge kerkar, E daiui abele neide: E erparik nerute au baker abele ao ra te, E bakeamulu.

⁶¹ Maria Magadalena pako nerute Maria, uaiba emrilei obakuei abele ao ge.

⁶² Abele nerute gerger, abele gerger maike abele derser gerger, gaire zogozogo le giz, pako Faresaio giz netate gedim Pilatoim,

⁶³ Kega, Opole ae, keriba ko dikiaporare abele bes le E emetu detager, Abele kerker eded, eseamud neis netate gerger kaka ko tekue.

⁶⁴ Dasmer, ma uiabi detager ko dimilu abele ao, mena bakedilu neis netate gerger, iaueakai nole abara kaimeg giz bakeuare ki ge ko abi eruam, a uiaba ko daratagerare abele ged, E ko tekueilu eudlam; iaueakai au bes keubu, abele kekiam bes.

⁶⁵ Pilato uiabi detager, Uaba nagri asesered le; ua bakeuare uabu dimrare.

⁶⁶ Uiaba bakeuare, a dimrare abele ao ge, a ikedi atamelam abele baker, a uader le ikedi uiabi asesered.

28

¹ Sabath eseamulu, baneigiri abele kekiam gerger sefen, Maria Magdalena pako nerute Maria ui bakeamlam abi dasmer abele ao ge.

² Dasmer, abele aukase demali: abelelam abele Opole ra angela kotorlam tarabu, E bakeam erbariklu adem abele baker ao telam, E egimulu abi tumge.

³ Abara op mokakalam perper ise, pako abara am uali au kakakak mokakalam kiona ise:

⁴ Uiaba asesered le au geum a durdur barki, uiaba tarbigrare mokakalam eud le giz.

⁵ Abele angela uiabi detager neis kosker, kega, Uaba nole geum kak; abelelam kaka umele uaba deraimer Iesu le, emetu satauroem.

⁶ E nole ike, abelelam E ko eded akaid, mokakalam E detager. Ua tabakeamlam abi dasmeram abele uteb abele Opole emetu uteid.

⁷ Ua bakeamlam dudum etomeret abara kaimeg giz, E akaid eudelam; dasmer, E kekiam bakeamulu Galilailaem, uaba keubu; uaba ko abi erdali abele uteb: dasmer, kaka etomeret uabim.

⁸ Ui bakeamlei dudum abele aolam, ui geum a au sererege; a koreder etomeret abara kaimeg giz.

⁹ Ui bakeamlei etomeret abara kaimeg giz, dasmer, Iesu ui obapit a kega, Kaka uabi omare. A neis kosker tabakeamlam, a itut abara teter ge, a abi esorgiru.

¹⁰ Iesu uiabi detager, Uaba nole geum kak: ua bakeamlam etomeret kara keimer giz, uiaba ko bakeuare Galilailaem, uiaba kari erdali.

¹¹ Ui bakeamlei, dasmer, uader asesered le bakeuare abele uteb, a natomertare gaire zogo-zogo le giz abele gaire lu uridili ikerare.

¹² A uiaba etami okakis gaire aule, uiaba mer atager, a ko nakuarare gaire mani uiabim abele gaire ares le,

¹³ A uiabi kega, Uaba natomertare abara kaimeg giz ki ge tabakeuare, a abi eruam, epe uaba uteid.

¹⁴ Ese opole asoli, a keriba abi idkubi, iaueakai uaba nagri debele.

¹⁵ A uiaba egardarare abele gaire mani, a uiaba ikelare mokakalam uiaba uiabi ereuerem: abele mer esali gaire Iudaia le giz bakedilu peirdi.

¹⁶ Abara kaimeg giz bekeuare Galilailaem, eleuen gaire le, abele paser ge Iesu uiabi mer tigri.

¹⁷ Uiabi abi erdali, a uiaba abi esorgiru: epe uader le nole oatut kak.

¹⁸ Iesu tabarki, a uiabi detager, kega, Emetu kari nakuar abele sirdam uridili, abele kotor ge pako abele geseb ge.

¹⁹ Dasmer, uaba bakeuare gaire ged narida uridili ko uiabi ereuerem, pako uiabi bapataiso Babe ra nei ge, pako abele Uerem, pako abele Lamar Zogo:

²⁰ Uaba uiabi ereuerem, a asesered gaire lu uridili kaka uabi detager: dasmer, kaka ko uabi kemem gaire gerger uridili, bakedilu abele geseb ra mop. Amen.

Meriam Mir Bible
The Four Gospels in the Murray Island or Mer
Language of Australia

Public Domain

Language: Meriam Mir (Meriam)

This Bible translation is in the Public Domain (not copyrighted) due to copyright expiration.

2023-04-03

PDF generated using Haiola and XeLaTeX on 22 Feb 2024 from source files dated 31 Aug 2023

333cd95a-a1c6-5b40-8ad9-641bf00decad